

KOPI MO FAASAOSAOGA TALAFEAGAI A SUI USUFONO

ASO LUA, 7 MATI 2017

Na tauaofia le Fono Aoaofa Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2017/2018.

FAILAUTUSI: E tusa ai ma le Tulafono Tumau 27(1), ou te faasilasila faaaloalo atu o lo o toesea le Afioga i le Fofoga Fetalai. Ona o lea, o le a tauaveina e le Sui Fofoga Fetalai le Nofoa mo le aso fono lenei.

Tatalo.

MALELEGA MAI LE SUI O LE FONO A SUI TOFIA

Na fofogaina e le Sui Fofoga Fetalai le Malelega mai le Sui o le Fono a Sui Tofia.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le malioga i le Fono Aoaofa Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2017.

TUUIINA ATU i lenei aso 3 o Mati 2017.

**(Sainia): Tuimalealiifano Vaaletoa Sualauvi II
Tuiloma Lameko
SUI O LE FONO A SUI TOFIA.”**

FAAALIGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

SUI FOFOGA FETALAI: E tusa ai ma le Tulafono Tumau 76 o le Palemene, ua tuuina atu ai nei le faaaliga i le Fono Aoaofa Faitulafono mo le iloiloaina o Tulafono Tau Faaofi ua faaaliga i nei:

1. Tulafono Tau Faaofi o Teuteuga o le Tulafono o le Fafoega o Kasino ma Taaloga Eseeese tau Tupe 2017.
2. Tulafono Tau Faaofi o Teuteuga o le Tulafono o Malosiaga o Leoleo 2017.
3. Tulafono Tau Faaofi o Teuteuga o le Tulafono o Galuega a le Malo 2017.

TUUINA ATU i lenei aso 6 Mati i le tausaga 2017.

(Sainia) Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malilegaoui
TAITAI O LE MAOTA.

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

SUI FOFOGA FETALAI: E tusa ai ma le Tulafono Tumau 100(2), ma tuuina atu ai nei le faaaliga i le Fono Aoaofa Faitulafono mo le iloiloaina o Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2017.
2. Tulafono Tau Faaofi o Teuteuga o le Tulafono o Malosiaga o Leoleo 2017.

TUUINA ATU i lenei aso 7 Mati 2017.

(Sainia) Susuga Hon. Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi.
TAITAI O LE MAOTA.

TUUINA ATU O PEPA

Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. S.R. 2017/1, Tulafono o Faamalumaluga e Faamau ai Meatotino tau le Tagata Lava ia – Faasilasilaga o le Amata Faamamaluina.
2. S.R.2017/2, Tulafono Faatonutonu o Teuteuga o Tulafono Faatonutonu o Falepuipui ma le Toefuataiga 2017.
3. S.R. 2017/3, Faasilasilaga a le Pulega o Taulaga (Tupe ua tataua ona Totogiina ma Fua Faatatau o Tupe Totogi) 2016.
4. P.P. 2016/2017 Nu. 155, Lipoti Faaletausaga Numera 7 a le Komiti o le Toefuataiga o Tulafono a Samoa Iulai 2015 – Iuni 2016.
5. P.P. 2016/2017 Nu. 156, Lipoti Faaletausaga a le Faalapotopotoga o le Malosi Faa-Eletise 2014/2015.
6. P.P. 2016/2017 Nu. 157, Lipoti Faaletausaga a le Pulega o le Suavai 2015-2016.
7. P.P. 2016/2017 Nu. 158, Faamatalaga o Sini Autu a le Pulega o le Suavai 2017-2020.
8. P.P. 2016/2017 Nu. 159, Lipoti Faaletausaga a le Faalapotopotoga o Mea tau Fale a Samoa 2016.
9. P.P. 2016/2017 Nu. 160, Lipoti Faaletausaga a le Matagaluega o Aoga, Taaloga ma Aganuu 1 Iulai 2015-30 Iuni 2016.
10. P.P. 2016/2017 Nu. 173, Lipoti Faaletausaga a le Matagaluega mo Tupe Maua Tausaga Faaletupe 2015/2016.
11. P.P. 2016/2017 Nu. 188, Lipoti Faaletausaga a le Pulega o Fale ma Malae Taalo a Samoa Iulai 2015-Iuni 2016.

TUUINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.51(5).

1. P.P. 2016/2017 Nu. 161, Lipoti a le Komiti o Tupe Maua ma Tupe Totogi i le P.P. 2016/2017 Nu. 107, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe 2014/2015.
2. P.P. 2016/2017 Nu. 162, Lipoti a le Komiti o Tupe Maua ma Tupe Totogi i le P.P. 2016/2017 Nu. 145, Lipoti Faaletausaga a le Faaputugatupe mo le Lumanai Manuia o Tagata Samoa 2015-2016.
3. P.P. 2016/2017 Nu. 163, Lipoti a le Komiti o Tupe Maua ma Tupe Totogi i le Lipoti o Faamatalaga o Galuega ma Tala o Tupe a le Faaputugatupe o Faamanuiaga o Tagatanuu Matutua o Samoa 2015-2016.
4. P.P. 2016/2017 Nu. 164, Lipoti a le Komiti o Tupe Maua ma Tupe Totogi i le Tulafono Tau Faaofi o Totogifuapauina ma Tau Faaee atu (Teuteuga Esee) 2016.
5. P.P. 2016/2017 Nu. 165, Lipoti a le Komiti o Tupe Maua ma Tupe Totogi i le P.P. 2016/2017 Nu. 143, Lipoti Faaletausaga a le Faaletupe o Atinae 2015/2016.

6. P.P. 2016/2017 Nu. 166, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale Faavae i le S.R.2016/9, Tulafono Faatonutonu o Teuteuga o le Tulafono Faatonutonu o Galuega a le Malo 2015.
7. P.P. 2016/2017 Nu. 167, Lipoti a le Komiti o Tulafono Tumau i le P.P. 2016/2017 Nu. 99, Lipoti a le Ofisa o le Komesina o Faiga Palota i le Faiga Palota Aoa 2016.
8. P.P. 2016/2017 Nu. 168, Lipoti a le Komiti o Tulafono Tumau i le P.P. 2016/2017 Nu. 109, Lipoti a le Komisi o le Toefuataiga o Tulafono a Samoa i le Resitala mo le Au Solitulafono i Faiga Aiga, Lipoti Faaiu 16/16.
9. P.P. 2016/2017 Nu. 169, Lipoti a le Komiti o Tulafono Tumau i le P.P. 2016/2017 Nu. 108 & P.P. 2016/2017 Nu. 140, Fuafuaga Autasi a le Ofisa o le Failautusi o le Fono Aoa o Faitulafono 2016-2018 & Lipoti Faaletausaga a le Ofisa o le Failautusi o le Fono Aoa o Faitulafono mo tausaga faaletupe 2014-2016.
10. P.P. 2016/2017 Nu. 170, Lipoti a le Komiti o le Vaega tau le Tamaoaiga i le S.R. 2016/6, Poloaiga o le Toe Fetuunaiga o le Faasologas o Tiute 2016.
11. P.P. 2016/2017 Nu. 171, Lipoti a le Komiti o le Vaega tau le Tamaoaiga i le S.R. 2016/11, Tulafono Faatonutonu o Meatotini tau le Atamai 2015.
12. P.P. 2016/2017 Nu. 172, Lipoti a le Komiti o le Vaega tau le Tamaoaiga i le P.P. 2016/2017 Nu. 133, Lipoti Faaletausaga a le Kamupani Vaalele a le Polenisia 2016.
13. P.P. 2016/2017 Nu. 174, Lipoti a le Komiti o le Vaega o Atinae Eeseese i le P.P.2016/2017 Nu. 141, Lipoti Faaletausaga a le Ofisa o le Pule Faatonu 2015.
14. P.P. 2016/2017 Nu. 175, Lipoti a le Komiti o le Vaega o Atinae Eeseese i le P.P. 2016/2017 Nu. 111 & P.P. 2016/2017Nu. 112, Lipoti Faaletausaga a le Pulega o Taulaga 2013/2014 & 2014/2015.
15. P.P. 2016/2017 Nu. 176, Lipoti a le Komiti o le Vaega o Atinae Eeseese i le P.P. 2016/2017 Nu. 105 & P.P. 2016/2017 Nu. 106, Faamatalaga o Sini Autu 2017-2020 & Fuafuaga Autasi 2017-2020 a le Pulega o Taulaga.

**LAFO A TAITAIFONO O KOMITI FAA-PALEMENE
TULAFONO TUMAU 52**

SUI FOFOGA FETALAI: O lea ou te tapa ai lau Afioga i le sui usufono o le Komiti o Tulafono Tumau o le sui usufono mo Falealili Sasae.

Afioga FUIMAONO TEO SAMUELU TEO (Sui Usufono Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae): Lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoa se faatagaga e faaopoopo ai le taimi e iloiloaina ai Pepa a le Palemene e 5 ua tuuina mai i lenei Komiti, ona e le i maea atoatoa Suesuega ma Iloiloga a le Komiti ma lipoti mai ai i le Fono Aoa i le Fonotaga o Me 2017.*

Faaluaaina e le sui usufono mo Safata Sasae.

Na faamaonia le lafo.

SUI FOFOGA FETALAI: Ou te tapa lau Afioga i le Sui Taitaifono o le Komiti o le Vaega o Atinae Eeseese.

Tofa OLO FITI AFOA VAAI (Sui Taitaifono Komiti o le Vaega o Atinae Eeseese): Faafetai i lau Afioga i le Fofoga Fetalai, e piiiama faatasi foi lenei sui usufono i le taulaga siitia e lau Afioga i lenei taeao. Ua ese foi lenei taeao ua maualuga lenei taeao i lou seei mai i le Nofoa, malo faafetai o ou mama na, faamalo foi faafetai. E faatalofa atu i lau Afioga i le Palemia ma le paia o le Kapeneta ae faapea foi le mamalu o sui usufono o le Palemene.

Ae ua ou tulai i le ava ma le faaaloalo i lau Afioga i le Fofoga Fetalai, ou te faatu le lafo, *Ina ia tuuina mai e le Fono Aoao se faatagaga e faaopoopo ai le taimi e iloiloa ai Pepa a le Palemene e 5 sa tuuina mai i lenei Komiti ona e le i maea atoatoa Suesuega ma Iloiloga, ia ma toe lipoti mai ai i le Fono Aoao i le Fonotaga o Me 2017, faafetai.*

Faaluaaina e le sui usufono mo Safata Sisifo ma le sui usufono mo le Itumalo Tu Taulaga Sisifo.

Na faamaonia le lafo.

SAUNOAGA FAAFEILOAI A LE SUI FOFOGA FETALAI

SUI FOFOGA FETALAI: Ou te manatu o lea ua maea ona fofola le fala i luma i le Malelega O Le Ao Mamalu i Sui o le Fono a Sui Tofia, e faapea foi Faaaliga mai le Taitai o le Maota, atoa ai ma talosaga a Komiti Faa-Palemene. A o se laolao lelei lenei matou te fia tafailoa ai le agaga o le faamalo ma le faafetai. E ia te au foi le agaga faaaloalo, ou te faafeiloai atu ai i le paia maualuga o le Maota, le paia o le Fonousu a Samoa, susu lau Susuga i le Taitai o le Malo lau Afioga i le Palemia, e faapea foi ona ou faafeiloai ma faatalofa atu i lau Afioga i le Sao Faapito le Sui Palemia, ae a le paia i le aiga Minisita, e faapea foi le mamalu maualuga i paia le vaea o Minisita Lagolago.

E ia te au foi le faaaloalo e faatalofa i le paia maualuga o sui usufono mamalu o le Palemene, malo le soifua, malo le tauatai, malo le faatoatoa i tiute ma faiva, o lea ua tatou feiloai ai i manu i lenei taeao. Ua manino le mata o le vai i lenei aso ma le faamoemoe. O le mea lea ua matou le nofonofa lava, e ao lava ona ou faafeiloai ma faatalofa i le paia maualuga i le tapuaiga a Samoa, i le paia i Aiga ma Tama, o Tama foi ma Aiga, Aiga o Nofo ma Aiga o Papa, Aiga o Ee, Aiga o Tupu ma Aiga na Tafaiifa. Ae a le Usoga a Pule ma Tumua, Ituau ma Alataua, Aiga i le Tai ma le Vaa o Fonoti. Ae le galo foi Afia i lona vao, e ao foi ona matou faafeiloai ma faatalofa i le Faigamalo i Sasae i le motu i Tutuila ma Manua, paia aua Sua ma Vaifanua, Fofa ma Aitulagi, Ituau ma Alataua, Saole ma Saleaamua ma le Launiu na Saelua. Ae tainane foi Tootoo o le Faletui, o Faleula ma Tama a le Manuatele. O paia sautuafafa ia o Samoa matou te ofo alofa ma faatalofa atu i le Fonousu a le atunuu i lenei taeao.

E ia te au foi le agaga faaaloalo e faatalofa i le tapuaiga leleoa a Lana Afioga Mamalu O Le Ao o le Malo, le afifio o Sui o le Fono a Sui Tofia ma a outou Masiofo. Malo le tapuai, malo le onosai.

E fia afea foi se matou faatalofa ma faafeiloai i le paia o le aiga Sa Levi, i tafa e fia o le atunuu. Malo le tatalo. O a outou tatalo ua manuia ai faiva o le Malo.

E faapitoa sa matou faafetai i lou itumalo, Gagaemauga Nu. 3. E a le aiga Sa Peseta ma lo latou Maopu. Alaalatai o le Usoalii le nonofo a ituaiga o le Faleiva ma oe le Matautu, e faapea foi le faamaluga o Malo. Malo le tatalo, malo le tapuai, lea ua mafua ai ona ae manuia faiva o le tatou itumalo, ua matou seei ai i le Nofoa. O upu masani lava a le Tusi Paia, ‘aia ne i ia te i tatou se mea e tasi, ae o mea silisili ia foi lava e fai ma viiga o le Atua.’

O le faafetai puupuu lea, ona o le maualuga o le aso, e tusa ai ma galuega e pei o le a feagai i le Maota o le atunuu.

TULAFONO TAU FAAOFI O TEUTEUGA O LE TULAFONO O LE FAAFOEGA O KASINO MA TAALOGA ESEESE TAU TUPE 2017 – faitauga muamua

Afioga Hon LAUTAFI FIO SELAFI PURCELL (Minisita mo Leipa ma Fefaatauaiga): Faafetai i lau Afioga i le Fofoga Fetalai, e muamua foi ona momoli atu le faamalo ma le faafetai i lau Afioga, i le tatou taulaga molia i lenei taeao fou o le tatou Fonotaga. E faatalofa atu foi i le paia o le Maota, susu o lau Afioga i le Fofoga Fetalai, le Afioga i le Palemia ma le nofo a Minisita, Minisita Lagolago ae tainane le mamalu o sui usufono. Ia faapena foi le lasilasi o le tatou faatasiga i lenei aso, e maitau atu o lo o i ai tatou fanau aoga o lo o sagisagi mai, e faalogologo foi ma maitauina ia tatou Fonotaga i lenei aso. Faamalo le soifua maua.

Ou te faapipii i le manatu o le sui usufono mo Salega, e ese foi faalogona o lenei taeao matou nei mai Savaii. E ese le onomea o lau Afioga i le sui usufono mai Savaii seei mai le Nofoa o le Fofoga Fetalai. Ia manuia ou faiva i lenei aso i le tauaveina o le tatou fonotaga.

E faatalofa atu foi i le paia o le faafofogaaga ia Samoa mai lava i mauga tetele seia paia maugaiti, o lo o outou tui le mulipapaga ma feula le mulila a o alo atu lau Palemene e saili se tofa aua le lelei o Samoa. Ia faatasi mai le Atua i le tatou Fonotaga i lenei aso.

Lau Afioga i le Fofoga Fetalai, ua ou tulai atu ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoega o Kasino ma Taaloga Eseese Tau Tupe 2017 i lona faitauga muamua.*

Faaluaina e le Minisita mo Tagata Tafafao Maimoa mai Fafo ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O
MALOSIAGA O LEOLEO 2017 – faitauga muamua**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI (Palemia, Minisita mo Leoleo): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Malosiaga o Leoleo 2017 i lona faitauga muamua*

Faaluaina e le Minisita mo Faatoaga ma Faigafaiva ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2017
– faitauga muamua**

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fetalai mo le avanoa, e faatalofa atu foi i le paia o le Palemene nei. Le afio o le Afioga i le Palemia, Minisita, Sui Minisita Lagolago aemaise foi sui usufono, o alo foi ma fanau ua tatou faatasi i lenei taeao ma Faauluuluga o Matagaluega ma Faalapopotoga Tumaoti a le Malo.

Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2017 i lona faitauga muamua*

Faaluaina e le Minisita mo Faatoaga ma Faigafaiva ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O
GALUEGA A LE MALO 2017 – faitauga muamua**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega a le Malo 2017 i lona faitauga muamua.*

E le i tuuina atu le fesili mo le faaluaina o le lafo.

Na faamaonia le lafo ma faitauina le Tulafono Tau Faaofi i lona faitauga muamua.

LAFO MO LE FAATAATIAESE O TULAFONO TUMAU 100(1)

FOFOGA FETALAI: Se i tulai mai lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo, *Ina ia faataatiaese Tulafono Tumau 101 (1) ina ia avanoa ai le faitauga faalua o Tulafono Tau Faaofi ua faitauina muamua i le aso fonolenei.*

Faaluaina e le Minisita mo Faatoaga ma Faigafaiva, Minisita mo Tagata Tafafao Maimoa Mai Fafo, ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma tulai ai le Tulafono Tumau 100(1) ua faataatiaese.

TULAFONO TAU FAAOFI O TEUTEUGA O LE TULAFONO O LE FAAFOEGA O KASINO MA TAALOGA ESEESE TAU TUPE 2017 – faitauga faalua

Afioga Hon LAUTAFI FIO SELAFI PURCELL: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoega o Kasino ma Taaloga Eseese Tau Tupe 2017 i lona faitauga faalua ma ou te fia tautala faamalamalama i ai.*

Faaluaina e le Minisita mo Faatoaga ma Faigafaiva ma le Minisita mo Tupe Maua.

FOFOGA FETALAI: Ou te tapa lau Afioga i le Minisita e saunoa faamalamalama i le Tulafono lenei.

Afioga Hon LAUTAFI FIO SELAFI PURCELL: Faafetai atu i lau Afioga i le Fofoga Fetalai.

Lau Afioga i le Fofoga Fetalai ma le mamalu o le Maota, o lenei Teuteuga o le Tulafono o se Teuteuga silisili lava lenei ona puupuu talu ona ou tulai mai au i le Maota lenei. Pau lava le agaga o le Teuteuga lenei na o le sui o le fuainumera o le 4 i le 5. O le taumafaiga lea ina ia mafai ai e le vaega lenei o le TAB Board ona latou faafoea pea le Tulafono lea o Taaloga o le Kasino ma Taaloga Tau Tupe mo le isi 12 masina i se taimi lea o tau tapena mai le Tulafono o le Teuteuga o le Tulafono o Petipetiga, ia e aofia ai uma lava mea tau taaloga tau tupe i totonu o le tatou atunuu. Pau lava la lea o le agaga o le Teuteuga lenei, mo se faatagaga a le Maota e teuteu ai le Tulafono Tau Faaofi, ia faaopoopo se 12 masina e avea ae pea e le TAB Board ia galuega a le Authority seia oo i le tausaga fou, ona o lea ua maea ma lamalama faaiu le 4 tausaga lea sa tuuina ai i lalo o le Tulafono. Ae o le talosaga i lalo o le Teuteuga lenei, ia toe faaopoopo se isi 12 masina atonu e fetau tonu lava ma le taimi lea ua maea ona aumai Teuteuga o le Tulafono tele lea e tapena i le taimi nei. Ia e fetau lava i le taimi lena ua oo mai foi le Tulafono o Teuteuga

o le Tulafono i totonu o le Maota ma fai foi i ai ia felafolafoaiga. Ia o le faamalamalaga lea lau Afioga i le Fofoga Fetalai.

FOFOGA FETALAI: O le avanoa lea mo sui usufono e fia saunoa i le Tulafono Tau Faaofi e pei ona faamalamalama e le Minisita. Tulai mai le sui usufono mamalu.

Tofa Hon LAUOFO FONOTOE NUA FESILI PIERRE LAUOFO (Anoamaa Sisifo): Lau Afioga i le Fofoga Fetalai, e ofo alofa atu foi i lenei taeao i lau Afioga i le Fofoga Fetalai o le Maota faapea foi le Palemia ma lana Kapeneta ma Minisita Lagolago, ia faapea foi sui usufono mamalu uma o le Maota. E manatu ua tea i lagi lagaali a Tamafaiga i lenei taeao o lele ua maea ona e fana le u i le vateatea, ia aua foi le tatou vatapuia ma le Atua.

E manatu foi o lele ua maea ona e paepae faatupe o taulafoga paia faaifoga gata o le atunuu, ia ma ua i ai foi le manatu o le a faataalolo atu i tootooau o Tumua ma Pule aua o le latou fatuaiga tausii lena, o latou o lo o tausii upu a le atunuu. O lenei taeao ou te tulai atu ma lou agaga faaaloalo, e faaali foi se manatu o lenei itumalo e tusa ai ma le Tulafono toe teuteu ua opea nei i le Maota.

Lau Afioga i le Fofoga Fetalai, o le tasi lenei atinae ou te talitonu e tatau lava ona faaleleia atili. Ae o se atinae foi e tosinaina ai i latou e tafafao maimoa mai i Samoa e faaalu a latou tupe i totonu o le atunuu ma fesoasoani ai i le atinaeina o le tatou tamaoaiga.

I lau asiiasi i ai i le Kasino i se tasi o aso, e maitauina ai e lou tagata e le o toatele tele lava ni tatou tagatanuu Samoa o lo o umia Tusifolau o isi atunuu, o lo o tafafao ai i totonu o le Kasino. O lau maitau i ai i lena afiafi e toatele lava o nai tagatanuu Initia, tagatanuu Saina ia ma nai tagatanuu Filipino mai o i Filipaina. Ou nofo lava lea ma toe mafaufau i le tausaga 2010 ina ua faaofi mai lenei Tulafono i totonu o le Maota lenei. I le tele foi o atugaluga sa faaalua ai i lenei lava Tulafono. Sa luga lalo le Maota, tele foi finagalo o le atunuu sa faaalua, ia faapea foi le atunuu sa oo mai i luma o le Komiti Filifilia a le Palemene sa latou iloilo ina lenei Tulafono Tau Faaofi i lena vaitau, ma faaalua foi o latou finagalo. O lea la ua faagasolo mai tausaga masalo lea ua 5, 6 tausaga, o le tele lava o mea sa atugalua i ai tagata, e leai lava se mea ua ou vaai atu ua tino mai po o ua taunuu. Ia o le tele o mafauauga sa i ai i lena vaitau, tele lava o le popolega i le tulaga o le aafiaga o nei mea o Kasino. Ae lea la ua ou vaavaai atu, e manaomia lava le faatupulaia o tagata e omai e tafafao i le tatou Kasino. O lona uiga, o lau fautuaga i le Malo, se i toe silasila i auala e tosinaina mai ai nisi tagata.

I lau maitau i ai i lau asiiasi i le kasino, e le o lava tagata. E fautuaina foi le Malo se i toe silasila ona o le toatele o tagata ia o tatou uso a tuaoi i Amerika Samoa ua feiloai i ai e fia agai mai ae i ai lava le tulaga foi lea e faigata o le feoaiga o le tatou va i le tulaga o pemitia ma tulaga faapena. E fautuaina le Malo ina ia silasila i se auala e faafaigofie atili ai ina ia toatele latou e omai, e fia omai foi e tafafao mai ma asiiasi mai i tatou kasino. O lea foi la ou te vaavavai atu ma ua maua i le Lipoti na o le tasi lava le laisene ua faapena ona tuuina atu. Atonu o lea ua lausilafia o le faletalimalo o Aggie Grey po o lea ua taua o Sheraton. A o le fautuaga i le tatou Malo, se i toe silasila pe i ai nisi kamupani mai fafo e toe tuu atu i ai nisi laisene ina ia faaopoopo mai nisi a tatou kasino. Aua e pei ona ou talanoa atu lau Afioga i le Fofoga Fetalai, e

faavae lava lou talitonuga i lou oo i ai ma lau tilotilo, e le o faapea o i ai ni aafiaga tele. O lea foi ua tatou silafia uma le tulaga o le atunuu ma le mea o i ai, a o vaega ia, e tatau ona silasila i ai aua o lea e maua i le Lipoti, e oo mai le aso pe a ma le \$2.5milionā le tupe maua ua maua e le tatou faapalotopotoga lea e vaaia kasino mai le pisinisi kasino lenei. O le mea lea lau Afioga i le Fofoga Fetalai e fautua atu ai i tulaga ia. O le 12 masina lea ua talosagaina ma aumai i totonu o le Tulafono Tau Faaofi e faaopoopo ina ia tauaveina ai pea le vaaiga o kasino, ia, o le TAB le vaaiga ma le faafoega o kasino, o lea ua savalia le lima tausaga o faafoe pea e le TAB Board, ae ou te talitonu foi lau Afioga i le Fofoga Fetalai, o lea lava e lava le agavaa o le Board lea latou te faafoeina ai. Vagana o i ai nisi fuafuaga i nisi suiga tetele o fougou mai, a o lau lava fautuaga, faaauau ai pea e le TAB Board le vaaiga o kasino ma le faafoeina o kasino ma le toe faaopoopo foi o le isi 12 masina. O lea lava e lelei le latou faafoeina mai o kasino mai ia tausaga e tele. Ma le isi itu, na o le tasi le laisene lea e i ai. Lona uiga e fuafua foi i le tele o le galuega. Ae o le fautuaga lena a lenei foi sui usufono lau Afioga i le Fofoga Fetalai i lenei taeao, o lea foi ua e seei i le nofoalii o le Palemene, o ou mama na. Matou te le selu atu, ae i ai le matou talitonuga e fou le Nofoa ae ua e masani.

SUI FOFOGA FETALAI: Tulai mai le sui usufono mamalu mo le Itumalo Tu Taulaga Sisifo.

Afioga FAUMUINA ASI PAULI WAYNE FONG (Itumalo Tu Taulaga Sisifo): Faafetai atu i lau Afioga i le Fofoga Fetalai, e faapipii atu foi i le saunoaga ua tuānai ona o le tulaga i le faafetai ua uma ona siitia i lenei taeao. Ae o le a taumafai atu se manatu leaga e puupuu foi le tatou aso. Faafetai mo le Tulafono Tau Faaofi ua tuu mai mo lenei aso, faafetai atu foi i le Afioga i le Minisita, e saolele lava lana saunoaga. O le Tulafono Tau Faaofi lava lea aupito sili ona puupuu, ae peitai, o le Tulafono foi lenei ua lima tausaga o tau gaosi, o lea foi la ua toe faaopoopo foi le isi 12 masina, o lona uiga, e le i lelei lava la fuafuaga lau Afioga i le Fofoga Fetalai. Ae na o se manatu, faafetai lava i le vaega lea o kasino mo le fesoasoani i taaloga, aemaise foi o au e masii atu i fafo o le atunuu o lo o fesoasoani i ai aua le faamoemoe ma le tausiga foi o le tele o au taaalo e avatu i atunuu mamao. Ae talitonu le agaga, e le gata i fesoasoani e avatu i au taaalo, ae tatau foi ona toe silasila le faalapotopotoga i tagata e faamanuiaina mai i taaloga nei. O lo o i ai nei le tulaga i letaimi nei, e le o lava safua le fesoasoani e avatu e le Matagaluega ia i latou e aoga mai taaloga. E aoga foi e toe faaopoopo o le 12 masina lau Afioga i le Fofoga Fetalai ina ia toe tagai ma silasila lelei le Pulega o le Kasino pe le tatau ona i ai nisi suiga laiti. E pei o le taimi lenei, na o i latou e faamanuiaina mai i pine auro. E le afaina le pine auro a le Commonwealth, e talitonu le agaga e pei e tau faigofie, a o le pine auro la o le taaloga foi lea o le Olympics, ou te masalo o se miti aupito sili lea ona faigata o lo o fetoi ma tatou i letaimi lenei ona e le iloa se tausaga, e le iloa se taimi. Ae tatalo atu i le faalapotopotoga, toe tagai ifo lava i le tulaga lea, aua i lou iloa, o le pine auro i le commonwealth po o taaloga faava o Malo, masalo po o le tu fa lena i le Olympics po o le tu tolu foi. A o lea ua i ai le tatou pine siliva i le Olympics ae leai se mea o maua. Ia na ona fesoasoani atu i le Pulega ma i

latou o lo o faafoea, pe le toe liuliu lava le tofa, toe tagai i le tulaga lea pe le ono maua lava sina faamanuiaga....

SUI FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Saillele Malielegaoi: Lau Afioga i le Fofoga Fetalai, e pei o tulaga ia o faiga faavae a le tatou Malo. E le mafai ona see atu le Malo i se tulaga e taofia ai le ausia o tulaga silisili. O lona uiga, o i latou uma lava ia e manatu a oo loa i le pine siliva ave i ai ni tupe tetele, e puupuu lava le latou vaai, e puupuu lava le vaai. Sa oo foi i le Commonwealth, ua tele tausaga o tatou i ai o taumafai, ona alu alu lav alea maua pine auro. E le o le faigata i letulaga o le le ausia o le malosi ma le tomai. O le mea lea e tupu i tatou taaloga, o mea o manua mai fafle, o latou lava ia e pulea mea o taaloga, o i latou lava na o lea e tulai mai ai tulaga faaletonu i le faafoega o taaloga. Ae le mafai ona see ese le Malo mai le faataatiaina o mea silisili e tautaua ai le atunuu lenei. O le mea moni lava e le tautaua le atunuu i se pine siliva, e tautaua le atunuu i le pine auro. O le mea la lea o lea ou te tulai atu ai e faamalie atu i le sui usufono, taatia ia manatu na, o manatu na o le Observer lea foi ua e saunoa mai ai, ae saunoa mai oe i ni mea fou. Ae le mafai ona seetia le finagalo o le Malo i mea ia, e le o ni mea foi faatoa faataatia atu ananafi. E o uma i latou nei e taaalo, ua uma ona taoto atu le alafua e fua i ai i latou e taaalo. Pei o le mea lena lau Afioga i le Fofoga Fetalai, ae soia tatou te faitau pepa faitau pepa faitau pepa ona omai lea aumai i totonu i i. Ae aumai nai mea foi nei anoa e faafogafoga atu i ai le Komiti ona fau ai lea o mea o faiga faavae lelei, aemaise e le o le tali i ina, a o le tali i le tulaga o mea tau taaloga ma le pulega o taaloga lea e mafua ai ona faaletonu performance a tatou tama fanau.

SUI FOFOGA FETALAI: Ia faamaea mai le sui usufono mamalu. Ae lelei ona fautuaina e le Nofoa le sui usufono mamalu. O le Tulafono Tumau e le mafai ona tagofia e le Fono lenei se mataupu e faatatau i se tagata e toatasi, e le mafai ona tali mai lena tagata i totonu o le Maota lenei. O le mea lena e fautuaina ai e le Nofoa le sui usufono mamalu, see ese i se isi mataupu, faaauau le lauga.

Afioga FAUMUINA ASI PAULI WAYNE FONG: Faafetai i lau Afioga i le Fofoga Fetalai, e faamalulu atu foi i le Afioga i le Palemia, e leai e le o se manatu o le Observer le manatu lea e taumafai atu iinei, o au foi e le popole i lena nusipepa pe faitau pe leai. O manatu lava ia o lo o tuu atu sao lava i lau Afioga, na o se fautuaga, ae a faapea o le finagalo lea, ia e leai se mea o i ai. Ae atonu e alu alu se taimi ia liuliu le tofa ona tulai mai lea o lea tulaga. Ae na ona tuu atu i ina.

Lau Afioga i le Fofoga Fetalai, o le a alu la lou manatu i le tulaga fou. O le taimi nei, o lea ua tatou tilotilo, e le o lava tagata tafafao pe o i le casino ina ia majua ai le tupe maua lea a tatou. Ae po o le a se finagalo o lena itu po o le Pulega, toe tuu maia i tagata Samoa e o e toe taumafai lena tulaga ua leva ona ou fia taalo, a o sina lave, e leai sou passport ese mai passport o tagata Samoa. E i ai lava i latou e mafai ona o agai i ai e tafafao ai, e i ai foi e e latou iloa lava e le agavaa i latou mo lea tulaga. Ae toe liuliu le tofa i lena itu,

ae faataga mai tatou tagatanuu tatou te o e tafafao ai, i lo le o i fafo e faaaoga tupe i fafo, a o lea lava e mafai ona faaaoga i inei. Ia, o le tasi lena fautuaga e tuu atu i lena itu, ae silasila i ai e toe tuu mai le avanoa mo i tatou ina ia mafai ona lelei pea lenei mafutaga.

SUI FOFOGA FETALAI: Malie le sui usufono o lo o tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi: Lau Afioga i le Fofoga Fetalai, o lea la ua manaia le fautuaga lea ua aumai. Ae o le tulaga tonu lava lena o lea sa tau fetoi ai le tatou Tulafono i le taimi sa fuafua ai, talu lava lea popole, aemaise lava le itupa o faifeau ma le toatele o le tatou atunuu sa malaga atu i Niu Sila. E i ai le pese na ou faalogo i ai na fau ma ta mai le taimi tonu lava lea na fai ai le tatou Tulafono. O le pese e faapea, o le mea lea o le masini kasino, e fai nifo, e na te aia tupe a tagata. O lona uiga e pei o le agaga o le pese, o tagata uma lava ia e o e taaalo i le kasino, e uma ane ua ai e le masini tupe, ae leai ni tupe e faatau ai meaai mo le fanau, ma totogi ai pili. E pei la o le tulaga lena o lea na mafua ai ona fau le tatou Tulafono i tulaga faapea, o le puipuia lava o tatou tagata. E i ai lava i latou e pei ua noatia i le tulaga o le kasino ma alu uma ai lava a latou tupe ae faaletonu atu ai ma latou aiga. Ou te le iloa la ona o le manatu lena o lea sa mafuli i ai i latou sa tuualalo mai, ma o le tulaga lena o lea na ala ai ona fau le tatou Tulafono faapea, ia taofiofia ai o tatou tagata mai le o e taaalo ai ma faaalua ai a latou seleni, ae tuu le mea taua o le soifua o le faaaogaina o fanau faapea foi ma le tele o faalavelave o aiga ma atinae tau aiga e ono lapelapea ona ua alu seleni e taaalo ai i le kasino. A o le mea moni, o lea ua tolu ia te oe lauga tuufaatsi ai ma latou sa lauga i totonu o le Maota lea talu ai e agai i le mea lea se i toe tilotilo le Malo pe le ua faamaonia nei, e leai lava ni o tatou tagata o aafia ai. O le mataupu la lena o lea ua outou saunoa mai lafo i le Minisita e tilotilo latou i ai i fautuaga ia ua aumai po o se mea tatau po o se mea e atili ai ona afaina o tatou tagata i le mea lea o le noatia o le soifua i le tupe. A o le agaga ia i fuafuga au i luma, masalo o le mea lea e taua foi mo i latou nei, se i toe tilotilo ane lava i le faatulagaga o le mea lea o le faafoega o taaloga, sa ou alu atu ou matamata ia Aggie, e lua laisene, e moni lava e tasi, ae tutusa lava e lua laisene o Aggie Grey. Ou te alu atu lava, e moni lava e i ai le laisene mo le vaega o le au lapopoa, ia, ou te tilotilo atu la, e le lelei ona faatulaga le latou e taaalo ai na o le au lapopoa. Ia o le vaega foi lea a o atu ma le tai \$200,000 a migi lava i le po e tasi e le afaina aua o le afaipisinisi aemaise lava i latou nei mai fafo. O i ina la e faafoe uma ai seleni o mea nei o kasino. Sa ou alu atu la ou tilotilo i ai, e savavali uma atu lava i le mea lea e taaalo ai le lautele, ae sa tatau ona i ai se latou faitotoa i tua po o se potu i tua e omai ai i totonu ma toe mou malie atu i fafo pe a faapea ua gau aano. Aua e toatele lava le vaega faapea e gau aano, ona mou malie atu ai lava lea i fafo e o e sue se mea e faavave ai ona oo atu i fea foi, i le parataiso o lo o faatali mai. A o le tulaga lena i mea faapea, o mea uma lava ia e tatau foi ona toe tilotilo i ai le Komiti, aua a lelei ona fuafua potu ia, o lona uiga o le a toatele tagata faipisinisi mai fafo e taaalo ai, ona tele ai foi lea o seleni e mafai ona maua ma tele ai tupe e faagaoioi ai tatou fuafuga e pei ona aumai i ai le fautuaga

manaia lava lea na aumai a le sui usufono mo Anoamaa Sisifo. O le toe faaopoopo atu lea.

SUI FOFOGA FETALAI: Ou te manatu o lea ua manino au o fala i le faamalalamalama a le Palemia. Le sui usufono mamalu.

Afioga FAUMUINA ASI PAULI WAYNE FONG: E momoli atu le faafetai tele i le Palemia. O lea ua toeitiiti talia le talosaga muamua, a o lea ua talia le talosaga lona lua. Ia, o le faatamala foi o i latou o lo o tafafao, ae a sau i le isi itu, e toe foi mai lava le tupe lea aua le atiae mo i latou o lo o moomio atinae. O lona uiga la o lea lava o lo o lelei pe a talia foi o tatou tagata.

Ia, na pau ia o nai manatu lau Afioga i le Fofoga Fetalai, ne i tele atu ona taofi mai lea, ae faatali se i foi mai le toeaina matua ona toe fai atu lea o nisi manatu se tele lau Afioga. Faafetai.

SUI FOFOGA FETALAI: Tulai mai le sui usufono mamalu.

Tofa OLO FITI AFOA VAAI: Faafetai i lau Afioga i le Fofoga Fetalai mo le avanoa. Leai e puupuu lava se manatu o lenei usugafono i le tulaga o le Teuteuga o le Tulafono Tau Faaofi.

E auai se manatu i le 12 masina lea ua faaopoopo ona o le tulaga foi i le taumafaiga o lea atinae e pei ona tulai mai. E pei ona saunoa le tootoo sa tamua i le mataupu lenei, e tele lava tulaga sa laga ai finagalo o le Maota i le mataupu lea i Kasino. Ou te molimau atu o au le isi tagata na matua iloga ona ou alu i le atoa ai i le mataupu lea, ae sa i ai la le manatu foi lele se i faataitai. I lau foi la tilotilo i le taimi lenei, e le o tulai mai lava ni aga foi ma ni tulaga sa popole i ai le matou Itu Agai foi i lena taimi. O lea lava e tilotilo atu, e sao le saunoaga a le Itu Agai ua leva foi ona ta fia alu ita ae leai sota passport toe laiti laisene. O le fautuaga lau afioga i le Fofoga Fetalai, e a pe a tatala ia na mea, o au na o le lua laisene ae tatala mai ni nai masini e omiomi taitasi i faleaiga ma tatou bar, e maua foi lea a totoe lava siliva a le tagata ia ma alu atu omiomi ai i ina a uma alu. A o le tulaga i le faapopolega i le faaalua o seleni ae le fai ai mea aoga, ia o le mea lena e i luga lava o le tagata latou. Ae pei o nai vaega ia lau afioga i le Fofoga Fetalai e tuu atu ai sina tuualalo, tau talatala lemu foi lele e pei lava o le amataga mai, sa tatou amata mai i le laisene e tasi, tatala lemu atu i le lua, talatala atu i le tolu, e fai ai nai laisene tai tasi mo nai faleaiga ma bar. Ae ua lava le tai tasi o masini e omiomi.

Ma le agaga faaaloalo.

SUI FOFOGA FETALAI: Tulai mai le sui usufono mamalu.

Tofa LOPAOO NATANIELU MUA (Vaisigano Nu. 1): E faatalofa atu i lau Afioga i le Fofoga Fetalai, ua logo i tino matagi lelei lenei taeao, vaavaai atu foi sulu o le tino ua seei mai sui usufono o le tatou motu i le Nofoa. Malo le soifua, malo foi le lagi e mama i le Palemia faapea foi le Kapeneta ma sui usufono mamalu o le Maota. E lagolagoina e lenei sui usufono le Tulafono Tau Faaofi e pei ona tuuina mai.

Ae fia avatu se talosaga i lau Afioga i le Minisita, fai se laisene o se Kasino e avatu i lou itumalo. Aua a outou silasila, ua ou faalogo i le Pulega o le Uafu, o lea o le a aumai le latou palolo tele lava e avatu e pamu mai ai le

oneone la e i totonu o le ava lea ua ala ai ona fai mai ua le mafai ona o atu ni vaa i Asau. Ona avatu lea e fai ai ni man-made beaches foi lele i o i le sami aupito i sili ona lanumoana tioata i totonu o Samoa, le sami lea e i i. E fia o atu foi la papalagi e o atu e tafafao ai. A avatu la se Kasino i o, e faasa pea nai tagata o le matou itumalo ona o i ai ae ua lava papalagi, ae o matou e kuka meaai a papalagi. Aua o lea o le a avatu nei le palolo lea ua sauni mai e le Afioga i le Minisita e faaloloto ai le ava, ona fai ai lea o ni atinae a faletalimalo tetele faapena i lou itumalo, ae maua ai galuega. Pau lena o le fautuaga i lau Afioga i le Minisita i lenei taeao.

Manuia le tatou Fonotaga.

SUI FOFOGA FETALAI: Manatu o lea ua maea felafolafoaiga i le Tulafono Tau Faaofi i le Faafoga o Kasino ma Taaloga Eseeese Tau Tupe 2017.

Ou te tapa lau Afioga i le Minisita, e talifuaitau i mataupu sa laga ma fesiligia e uiga i le Tulafono Tau Faaofi lenei.

Afioga Hon LAUTAFI FIO SELAFI PURCELL: Faafetai atu i lau Afioga i le Sui Fofoga Fetalai. E momoli atu le faafetai i sui usufono mamalu sa tulai mai ma faaali mai o latou finagalo e uiga i lenei Teuteuga. E ui lava.....e pei ona ou fai atu e puupuu lava le Teuteuga, e na o le tasi lava le fuainumera e sui. Ae o le manaia ia o finagalo ua faaalua. E pei ona saunoa foi le Palemia i le taimi foi na tau fai ai lenei Tulafono, o lea na ala ai ona tulai mai ni faiga ia e restrictions ma tulaga foi ia se i taofiofi, ona sa tele lava le faitio tele foi manatu tetele, po o manatu sa le fiafia i lena vaitau. Atonu o lea ua savali le....pe ua ova atu nei i le lima tausaga talu ona faamalosi pe faatagaina mai ia Kasino. O lea foi la ua amata ona tatou tilotilo ma tatou iloa mea e tatau ona tatou agai i ai, pe faaauau ai pea ia restrictions nei, pe amata loa ona tilotilo foi i nisi auala e ono penefiti ai le toatele o tagata i nisi suiga e tatau ona fai. Ae pei ona ou fai atu o lo o i ai le Tulafono Teuteu e toe teuteu atoa ai le Tulafono lena, e aafia uma ai lava taaloga lava tau tupe po o ituaiga e lavea ai le Kasino, Bingo, o taaloga ua vaaia nei i le tulai mai o tekonolosi faaonoponei. O lea ua tele ai lava le aafia o tatou tupe maua e pei o le mea sa i ai i lalo o isi tatou taaloga o lea sa pulea solo e isi authority. O le Tulafono la lea pe a tuuina mai i le Maota nei, o le a taumafai e aumai uma lava le vaega lea i lalo o se authority se tasi. O le tulaga lena o lea e tapena ai le Tulafono. Atonu o le a aliali mai i totonu i ina nisi o manatu ua faaalua i lenei foi taeao. Ae faafetai atu i manatu ua faaalua, faafetai mo le avanoa i lau Afioga i le Fofoga Fetalai. Soifua ma ia manuia.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faafoga o Kasino ma Taaloga Eseeese tau Tupe 2017 i lona faitauga faalua.

SUI FOFOGA FETALAI: E tusa ai ma le Tulafono Tumau o le a tuuina atu ai le Tulafono Tau Faaofi o Teuteuga o le Tulafono o le Faafoga o Kasino ma Taaloga Eseeese tau Tupe 2017 i le Komiti o Tupe Maua ma Tupe Totogi mo le iloilo ina ma toe lipoti mai i le Fono Aoa o le Fonotaga o Iuni 2017.

**TULAFONO TAU FAAOFI O TEUTEUGA O LE TULAFONO O
MALOSIAGA O LEOLEO 2017 - faitauga faalua**

SUI FOFOGA FETALAI: O le Tulafono Tau Faaofi lenei e faagasolo i lona tulaga faanatinati. E tusa ai ma le faasilasilaga mai le Taitai o le Maota. O le mea lea ou te tapa lau Afioga i le Palemia o le Minisita mo Leoleo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Malosiaga o Leoleo 2017 i lona faitauga faalua, ma ou te fia tautala faamalamalama i ai.*

Faaluaina e le Minisita mo Faatoaga ma Faigafaiva, Afioga i le Minisita mo Tagata Tafafao Maimoa mai Fafo, ma le Afioga i le Minisita mo Tupe Maua.

SUI FOFOGA FETALAI: O le avanoa lenei e tuuina atu i lau Afioga i le Palemia, e saunoa faamalamalama e tusa o le Tulafono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga e tasi lenei Tulafono puupuu na matua ioeina e le tatou Fono i le aso ananafi. Na manino lelei le faamalamalamaina e le tatou Matagaluega o Leoleo i le tatou Palemene. O le agaga maualuga o le Tulafono ina ia faataoto lelei taiala, faatoa mafai ai ona tatala ma ioeina e le Minisita o Leoleo le faaaaupegaina o leoleo. Ma o ia foi taiala e agai lava i le puipuiga, aua ne i faaoga sese ia laau malosi. Ma le vaega taua lava lea o le puipua o i latou e ono afaina ona o lo o i ai se talitonuga, o lo o arm ia...o lona uiga o lo o umia e lē o le a molia ni auupega malolosi ma e ono faaoga. O lona uiga la, o i e tataua loa ona faataua le soifua o le puipua o soifua o leoleo, po o tagata lautele foi. A ua lamatia lo latou soifua, o lona uiga, o taiala nei o le a atili faafaigata ai ona soona faaoga sese ia laau malosi e leoleo ina ia taofia ai ni faalavelave e ono tutupu mai. Ma e ao ai foi i le Minisita ona vaai ma le Loia Sili ina ia manino lelei foi i le Minisita ia le Tulafono o lo o puipua ai le faaoga tatauina o mea nei o laau malosi. O le toe faataua lea o le galuega a leoleo i totonu o le tatou atunuu. O se atunuu e le faaogaina ai ni auupega, ae fulisia i le faaoga o le aganuu, e gau ai le sila i le fai. I le tulaga foi lea o le faatalanoa ma faauma ai ia feeseeseaiga nai lo le tagofia o mea nei o auupega. O se tulaga faigata tele lea, ona o nei aso ua tele lava ina sao mai i totonu ia laau malosi ma le mafuaaga foi lena e fai ma alu ai osofaiga a leoleo i le tulaga o le ao mai o laau malosi nei e sao mai i totonu o le atunuu ma o lo o taumafai foi le Matagaluega o Tiute, ina ia maua ni masini e faigofie ai ona iloagofie ia ni auupega e aumai nana i totonu o atopau, po o nisi foi uta tetele e aumai i totonu o pusa oloa mai fafo, ona o ni uiga faasolitulafono e mafua ai.

Lau Afioga i le Fofoga Fetalai, o le faamalamalamaga lena o lenei Tulafono e faapei ona toai mai i le Maota i le taeao nei.

SUI FOFOGA FETALAI: O le avanoa lenei mo sui usufono e fia saunoa i le Tulafono Tau Faaofi e pei ona folasia i le Maota.

Tulai mai le sui usufono mamalu mo Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO: Faafetai mo le avanoa i lau Afioga. E talitonu foi e le umi se manatu e fia faaalia i lenei Tulafono taua, o le Teuteuina lea o le Tulafono Autu 2007. Ina ua faatulai mai le Tulafono Autu i le 2007, e le i faigofie foi i lona faaulufaleina mai i totonu o le Maota ma saunoaga foi a sui usufono mamalu sa sausaunoa i ai.

E lagolagoina e lou sui usufono le Teuteuga, e fua lea i totonu o Samoa ma tulaga i le tatou va nonofo ai ma afioaga. E taua le aganuu, faaaoga lelei e leoleo le aganuu i taimi e faatino ai o latou tiute, taimi i le faaaaupegaina o leoleo ma tulaga faapena. E manaomia le faatagaga a le Minisita mo Leoleo, ma o lena faatagaga e tuuina atu ma ina ua maea ona feutagai ma le Loia Sili a le Malo. E taua, aua e tatau foi ona i ai se fautuaga tau le Tulafono. O le vaega lea o le Teuteuga lau Afioga e fia ave i ai lau faamamafa, o le tuuina mai lea i totonu o le faatagaga o le taimi amata ma le taimi eai le faatagaga po o le approval. Ona pei e foliga mai i lau faitau atu i le Tulafono, e tatau ona tuuina atu o se faatagaga tusitusia, e tatau ona i ai le Commencement ma le Expiration Date, i lau lea faitau atu i ai ma lau faauigaina o le Tulafono Tau Faaofi i le vaega tonu lea. O le tulaga foi lea o lo o i ai si atugaluga ia te au, o le taimi, o le taimi e saili ai ma taumafai ia maua le faatagaga a o se faalavelave faafuasei e tatau ona faatino loa le gaoioiga. O lea la e lelei le Tulafono i lau vaai ma ou lagolagoina, i totonu lava o le tatou atunuu ma lo tatou va nonofo ai. Ae e fesilisili lou mafaufau i le tulaga i ni faalavelave e tutupu mai i le malae vaalele. O le faataitaiga; po o le uafu, i ni faiga faatupu faalavelave, a ua manaomia ai le vave loa ona gaoioi. E faataua le Urgency, faanatinati, ia aua ai ona toe taofi loa, lava tapena leoleo i taimi uma. Pei o le tulaga lea e agai atu ai se fautuaga, se i silasila i lea vaega, pe i ai sina teuteuga faaopopo i le teuteuga lenei mo ituaiga gaoioiga faapena, ina ia aua ai ne i umi se taimi o faatali se approval, ae ia gaoioi loa. E pei o se fautuaga lea lau Afioga pei ona ou talanoa atu. E puupuu se manatu o lenei itumalo, manuia le Fono.

FOFOGA FETALAI: Tulai mai le sui usufono mo le Itumalo Tu Taulaga i Sisifo.

Afioga FAUMUINA ASI PAULI WAYNE FONG (Itumalo Tu Taulaga Sisifo): Faafetai i lau Afioga mo le avanoa, leai e puupuu lava se manatu. E au foi lenei itu, e au foi lenei sui usufono i tulaga uma o vaega o le teuteuga o le Tulafono. Ae tasi lava si fautuaga lea e fia avatu, i tulaga i pemita ia i le umia o laau malosi nei, ia o laau malosi nei, o lo o avatu ia faatagaga i le Ofisa o Leoleo e umia ai e tagata lautele ia auupega nei. A fuafua atu la i ai, masalo e tele atu ia pemita ua uma ona faaaaupegaina ai le Ofisa o Leoleo i latou i tua i lo le afaiga o leoleo o lo o i ai i le taimi lenei. Ona i ai lea o se popolega i pemita ia e avatu i tua lau Afioga i le Fofoga Fetalai, pe le alagatatau ona toe tilotilo la le Ofisa o Leoleo i le toe faamaopoopoina o laisene ia e issue atu i tua aua ia le faaaaupegaina foi o le atunuu po o le mamalu o le atunuu. O lea e malamalama i tulaga na ala ai ona aumai le pemita, aua ia meaituaolo aua foi le vaavaaiga o faatoaga ma tulaga faapena. A o le taimi foi lena, o lea ua avatu e tatou le faatagaga i tua i le lautele o le

tatou atunuu latou te umia ai la ia auupega nei, a o lea e tau fai e le Ofisa o Leoleo ia lenei process tele, ina ia mafai ai ona umia e latou ia auupega nei.

O le manatu lau Afioga, toe valaau uma i latou o lo o i ai pemitā e toe omai i totonu e toe fai lelei se aoaoga lau Afioga i le....

FOFOGA FETALAI: Malie le sui usufono, se i tulai mai le Afioga i le Minisita e fitoitonu i le Tulafono Tau Faaofi e tali atu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E faapitoa tonu lava i le tulaga lea o le faaaogaina e leoleo o auupega, e le o aofia ai isi mea.

FOFOGA FETALAI: Tulai mai le sui usufono e faaauau.

Afioga FAUMUINA ASI PAULI WAYNE FONG: Ia e sao lava i le faaupegaina o leoleo, o lea ou te fai atu o lea ou te au i le Tulafono lea ma le Teuteuga, a o ni vaega ia e puipui ai foi nai leoleo latou aua e le faapea o le a fai le Tulafono a Leoleo, ae tatau ona toe tilotilo lelei ia i latou o lo o umia e aumai i totonu, toe iloilo lelei laisene, vaai i latou o lo o i ai laisene ia ma fai i ai se galuega i le mafuaaga ma le agaga na ala ai ona avatu i tua laisene ia. Ma le faaaloalo lava, faafetai.

FOFOGA FETALAI: Tulai mai le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA (Vaimauga Sasae): Faafetai lava i lau Afioga i le Fofoga Fetalai aemaise le paia o lenei Maota. E faatalofa atu foi i le afio i le Taitai le Afioga i le Palemia faapea foi le Sao Faapito o le Sui Taitai, aemaise foi le faafofogaaga o Faauluuluga o Matagaluega ma Kamupani ma nai fanau aoga sa tatou tapuaia, aemaise foi o le faafofogaaga a Samoa i maota ma laoa o lo o tapuaia le Fonousu a Samoa, tainane foi le tapuaiga a si ou itumalo pele o Vaimauga Sasae.

E tau manatu lava lenei usugafono ona o le taua o le mataupu ua tuuina mai i lenei Maota. I le tausaga ua tuanai sa leai ni tulaga faapea i totonu o le Matagaluega o Leoleo, ona sa fai lava i le vafealoai e pei ona malele lo tatou Taitai i lenei taeao, tulaga lea sa i ai. O lea la ua alu alu le tulaga lea sa faaaogaina ai foi ia, se i tulou ia, o le lelei lava o fofoga o alii leoleo sa faatino ai i le va ma afioaga. Pau lava sina manatu e tuuina atu i lau Afioga i le Fofoga Fetalai, o lea ua vaai atu i le process a leoleo e le o i ai, e le o i ai i le pulega a alii ma faipule, e tatau ona tau i ai i se tulaga i le process lea, a o le i alu le osofaiga e tatau ona fesootai alii ma faipule, o i lea e malu ai le afaigaluega lea po o malu o le Malo, aua o le mea lena o lea e afaina ai ia le afaigaluega, o le o atu lava o ia osofaiga i tuamaota ma mea ia e tutupu ai le masalomia, ae le logo le pulega a alii ma faipule lea. Aua a o faatasi le Matagaluega ma alii ma faipule, e leai ma se mea e gase. Ona o lea? Ona o le malu lea e i totonu o le afioaga lea, o lea foi e mamalu ai lo tatou atunuu i totonu o pulega a alii ma faipule. A o lau vaai atu i le process lea, o lea e alu lava e le o faatauaia le...E pei ona ou fai atu i tausaga ua tuanai, e leai lava se Tulafono lea sa faaoga ai auupega. Ona o le a? O le vafealoai lea e faatino ai le auaunaga i totonu o afioaga, a masalomia loa, soalaupule le Matagaluega ma alii ma faipule ma taitai mai le pagota lea i totonu o le Matagaluega pe fai

i ai le faaiuga a le nuu. A o le mea lea ua ou vaai atu i ai, o lea ua faaaoga le auupega ona ua le malupuipua ia le tulaga lea ua o atu lava le Matagaluega ma o fai le osofaiga e aunoa ma le logoina o le pulega a alii ma faipule.

O lona lua, o lau tau maitau lava i le.....

FOFOGA FETALAI: Malie le sui usufono mamalu, se i tulai mai le Minisita mo Leoleo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea lea e atugalua ai le sui usufono, o le mea lena o la e fai. E i ai la ia afioaga foi o lea e aafia ai ma alii ma faipule. O lona uiga la e o leoleo e logo alii ma faipule, e o atu ua uma ona aveese uma e ali ma faipule ia latou mea sa toto. O le mea la lea, o lea o lo o faagasolo lava i le mea o le faautautaga tatau. Masalo pe a toatele tele ni nuu pe tasi ma le afa o aafia i le mea lea. O lona uiga la o le 99% o le atunuu e le o aafia ai, ae i ai afioaga e lavea i le mea lena, e taulamua alii ma faipule ona toto le mea.

Ia pei o le tulaga lena e le work ai la i i le fautuaga a le sui usufono.

SUI FOFOGA FETALAI: Faafetai i lau Afioga i le Minisita. E manatu le sui usufono o lea ua manino le mata o le vai.

Tofa Olo Fiti Afoa Vaai: Lau Afioga i le Fofoga Fetalai o se mea e fia faamalamalama i le saunoaga a le sui usufono e tusa ai ma le finagalo.

SUI FOFOGA FETALAI: E fautuaina le sui usufono mamalu lea, e lelei ona alaala mai i lalo. Se i faamaea pea le sui usufono mamalu lea mai Vaimauga Sasae ia ona maua foi lea o lou avanoa.

Tofa Olo Fiti Afoa Vaai: Lau Afioga i le Fofoga Fetalai, o lea ou te faauilavea e tusa ai ma le Tulafono Tumau a le Maota i le saunoaga, ae afai o lou finagalo lea, ia manaia foi ae faataitai.

SUI FOFOGA FETALAI: E maua lou avanoa. Faaauau le saunoaga a le sui usufono mamalu mo Vaimauga Sasae. O lea ua manino le saunoaga a le Taitia o le Malo.

Afioga SULAMANAIA FETAIAI TAUILILI TUIVASA: Faafetai mo le saunoaga a le Afioga i le Taitai. E pau le agaga na avatu ai ina ia malupuipua le aufaigaluega, ae amatamea lava le sui usufono. A iloa loa e le Matagaluega o Leoleo ua masalomia se tuamaota ua i ai se togalaau, logo muamua lava le sui usufono o le itumalo lea, e fai muamua lana galuega ona oo ai laia i totonu o pulega a nuu, ae ia mafai ona soalaupule muamua ma nuu ma faipule, a fofu alamea ai lava i i, ia ua leai se osofaiga, ae a alu atu lava i i ua leai, ia ona faatoa gaoioi loa laia ua le logoina leoleo.

O lona lua o manatu, o le tulaga lea ua faaaoga le auupega. Ia a faaaoga loa le auupega e tatou te iloa lava o lea ua i ai laau malolosi ia i le Matagaluega. Ae pei o le lagona o le sui usufono, i ai fana foi ia se i tulou, lea e faaaoga i Niu Sila pei ni Laser e mafai ona o atu loa faaaoga tafana loa, se i tulou, ia sipaka loa. Ae a faaaoga loa le fana lea laau malosi, na o le taua lava i le

Matagaluega o Leoleo ma afioaga. Ae pei la o lo ta ita lagona, aumai fana ia e moni lava e taugata i Niu Sila, a o fana ia na o le faamoe ai lava o le pagota, aumai loa iinei fai ai le suesuega.

E pei o le lagona lena o le sui usufono, ina ia avatu e teuteu ai lenei mataupu, ona o le Matagaluega lenei o Leoleo ua tele suiga o lo o i ai. O lea foi e avatu ai le avanoa e...Ae pau lea o le Matagaluega sa faatino lava le latou auaunaga ona o lo o i ai nai tamalii matutua, o le tele o service a le Malo ma Matagaluega a le Malo ua laiti pulega ma tulaga o lo o i ai. O le ala foi lea ou te manatu au sa malu ai le auaunaga a leoleo, ona o le matutua foi o tupu ma tamalii o lo o galulue ai, a o lea la ua oo i lenei talutalufou ai ona ua talavou foi le komesina, lea ua oo loa ina faaaoga le laau malosi. A o le mea sa i ai sa malupuipua lava i tulaga pei ona ou taua i pulega a alii ma faipule, ae a amatamea lava le sui usufono o le itumalo ia, ina ia mafai ona fesoasoani i o latou afioaga o lo o i ai le faafitauli.

Ia manuia lau Afioga i le Fofoga Fetalai.

SUI FOFOGA FETALAI: Se i tulai mai lau Afioga i le Minisita.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ou te tulai atu lau Afioga i le Fofoga Fetalai, ou te le i vaai i laau malos ia lea e faamatala mai e le sui usufono. Pe mafai lava ona...Ni fana memei? Mea ia pei o fana ia e tatou te vaai ai i tifaga a oomi loa ua alu mea pei ni manoa, a? O le ituaiga fana na?

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, leai o le fana lava, a o le pulu e alu e sipaka ai le tagata i le pulu lea pe a pai ia te oe.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E tusa la a pai...e le o le fana na o lea e fana ai povi?

Afioga SULAMANAIA FETAIAI TAUILILI TUIVASA: Leai lau Afioga, o le fana lava lea o le Laser lava le mea lea.

E faauma atu ai se manatu lau Afioga i le Fofoga Fetalai, faaaoga ai ma a tatou taifau, se i tulou. A alu le osofaiga e le gata e ave le laau malosi, ae faaaoga le taifau sosogi lea e alu ai a tatou tupe ina ia fesoasoani ai i alii malu o le malo. Manuia le Fono.

SUI FOFOGA FETALAI: E fesoasoani atu i le mataupu lea. O le Taser le tauga o le fana lea e taua e le sui usufono mamalu lea e faaaogaina e leoleo i tulaga faapea.

Tulai mai le sui usufono mo Salega Sasae.

Tofa Olo Fiti Afoa Vaai: Faafetai i lau Afioga i le Fofoga Fetalai. Leai e faamalulu atu foi i le taimi na tulai atu ona o se mea sa fia faasao i le saunoaga a le sui usufono, ae pule lava lau Afioga.

Ae o le Tulafono Tau Faaofi lenei e auai lenei itumalo i le Tulafono, ma e i ai lo matou manatu, o le 99% o le Tulafono lenei e faaaoga ai mo mea faafuasei, emergencies. Ae o le process lea ou te tilotilo atu i ai, masalo pe

maua le itula. Manaia lava le amataga foi lea ae sau sau lava toe oo mai i le Loia Sili, ia toe umi loa i ina le process lea e faaoga i le mea lea. Aua e le faapea e tuu atu loa i le afioga i le Loia Sili po o le a sona finagalo i le vaega lea, ia ona faapea mai lea, o lea. Aua e eseese ituaiga faalavelave e tutupu mai i totonu o le atunuu, aemaise foi faalavelave e agai mai totonu o le tatou atunuu.

O le fautuaga lava lau Afioga i le Fofoga Fetalai, pei e manaia aua o faalavelave masani, ae fai lelei ni semina a lau Afioga i le Minisita ma lau Kapeneta, aua e i ai taimi e te toesea ai ona acting lea o isi e latou te issue ina le mea lea o le warrant. Ia malamalama uma i itu uma lava o ituaiga faalavelave e tutupu mai, ona vave lea ona fai i ai ia se fuafuaga.

O le isi vaega lea lau Afioga i le Fofoga Fetalai, o lea e manino mai i se vaega o le Tulafono Tau Faaofi, e le gata i le faaaupegaina o alii leoleo, ia ae ua i ai ma so o se tagata. Lau Afioga i le Fofoga Fetalai ou te fautuaina lau Afioga i le Minisita, se i toe silasila lava i le vaega lea. Ona e i ai tulaga e faaeteete i ai leaga o lea ua general mai le upu lea, so o se tagata. O le toatele o tagata e le agavaa i le faaogaina o laau malosi lea e faaoga nei e leoleo. Ae afai o le tulaga lea, lelei, ae ia i ai ia ni aoga a tagata faaleoleo....

SUI FOFOGA FETALAI: Malie lava le sui usufono, se i tulai mai le Minisita e tau faamanino le vala lea.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi: Se i tilotilo ane lava i so o se tagata lena, e le o agai i leoleo, a o le puipuiga lena e moomia. O le faaogaina lava ia na o leoleo lea e agai i ai le Tulafono mo le faaogaina. Ae manatua foi so o se galuega lava e fai, e i ai lava ma le faautaga tata. E piilua lava le faatinoga ma le mea lena i te i ua galo ia te oe. Ae so o se tagata lena e te faitau i ai, o lena e te faitau sese mai.

SUI FOFOGA FETALAI: Ia, tulai mai le sui usufono mamalu.

Tofa Olo Fiti Afoa Vaai: O lea ou te faitau lelei lava i i, o le faaaupegaina o se alii leoleo, po o, o le po o le mea lea e sau i i, or, so o se tagata. Ou te iloa ua sese lau fuaiupu lea, ae toe faasao. A o lea ua avatu le fautuaga i lau Afioga, toe faasao ane.

O le fautuaga mulimuli lau Afioga i le Fofoga Fetalai, o le Tulafono lea na avatu o lea ua toe oo lava i le mea lea na i ai nei.

SUI FOFOGA FETALAI: Se i tuu atu le avanoa i le Minisita.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi: Lau Afioga i le Fofoga Fetalai, o le gata lena i le alu o le osofaiga a o lea e masalomia o la e faaaupega, o la e i ai lana auupega. A o le mea lea o lea e agai tonu lava le faaogaina i leoleo. Ua e maua mai?

SUI FOFOGA FETALAI: Tulai mai le sui usufono mo Salega Sasae.

Tofa Olo Fiti Afoa Vaai: Faafetai. Ia afai loa la ua le... aveese la le... o le fuaiupu muamua lava lea e sau ai le mea lea, aveese loa la ae faagata loa la i leoleo pe afai o lea na o leoleo, ae leaga o lea e i ai leoleo, po o so o se tagata. Ui i lea lau Afioga i le Fofoga Fetalai, o le Tulafono lea na pasia muamua atu, na avatu lava i le taimi lea faamanino, o le auga atoa, se i vagana le Afioga i le Minisita e na te aumaia se faatagaga e faaaaupegaina ai alii leoleo pe a tulai mai se faafitauli.

Ia, o lea ua toe oo i le mea lea ua toe teuteu toe oo i ai. Aisea? Na avatu le Tulafono ae ua nonofo foi le Minisita ma le Ofisa ua tuu i le tolu masina le umi e valid ai le warrant lea e issue atu. O le mea la lena o lea e tulai mai ai le tele, ua tutupu mai ai faaletonu ona o le le usitaia e lau Afioga i le Minisita mo Leoleo ma lau Matagaluga o Tulafono e pasi atu i le Palemene. Ae ou te le iloa po o a tou Tulafono na ua fai ifo i ina, ae faamolemole, usitai i Tulafono a le Palemene. Faafetai mo le avanoa.

SUI FOFOGA FETALAI: Faafetai. Ou te manatu o lea ua malamalama ma manino... Ia, tulai mai le sui usufono mo Falealili Sasae.

Afioga FUIMAONO TEO SAMUELU TEO: Faafetai i lau Afioga i le Fofoga Fetalai. Ou te manatu e le laaloa lena mataupu e le fai i ai se lagona o lena itumalo. O nisi vaega o lena Tulafono ma fesili foi sa i ai ua uma ona manino i le aso ananafi. Na pau lava le tuualalo, a silasila i le (1) seia oo lava i le (5) o vaega o le Tulafono Tau Faaofi lena, e taua ia o le saogalemu o le tagata. O lea foi e manino ma malamalama o lo o aafia ai foi ma le puipuiga o le saogalemu o i latou e faatinoina le tusi tulafono po o le warrant lea e o faatasi ai ma leoleo.

O le atugaluga foi lea i le taimi faatapulaa e pei lava foi ona tau avatu ai se lagona, o le aso e amata ai ma le aso e muta ai. Mo se faataitaiga, a tilotilo i le Tulafono Tau Faaofi lena, e pei e foliga e faataua lava mea o osofaiga foi nei faanatinati ia i latou o lo o faapea ona solia le tulafono lea o le totoina o laau faasaina po o i latou foi ua ono masalo ua faaaaupegaina i ni laau malolosi ma ono lamatia ai le soifua o le lautele. O se talosaga foi lea i le taimi lea ua faamatuu atu ai le pemitia po o le faatagaga, e le o i ai se vaega maoti, o lea e tau mai e i ai le aso e amata ai ma le aso e muta ai. O le popolega, afai e alu le osofaiga lena ua le maua i latou i le aso lena pe atoa le vaiaso, a o lea lava e valid le tulaga lena, o lona uiga o la e arm lava leoleo, foi lele ina ia mafai ona tuu i totonu o le Tulafono Tau Faaofi lena, a maea loa le faatinoina o se osofaiga sa faapea ona aumai ai le faatagaga ona faaleaogaina foi lea o le malosiaga lea.

O lona lua o talosaga, e pei e piiama se lagona i le finagalo o le sui usufono mo Aleipata Itupa i Luga i le tulaga foi lea o faalavelave faanatinati lea e tutupu faafuasei. O lea ua i ai i lalo o le Tulafono le masalomia o se tagata ua faaaaupegaina i ona uiga ma tulaga faaalua e iloa ai o lea ua lamatia le saogalemu o le lautele, a o le process lea tatou te tilotilo agai i ai, o le logoina o le Minisita ma le Loia Sili. E oo atu i le taimi e aumai ai le faatagaga lea, masalo ua toatele nisi ua afaina. Ae pe leai se isi vaega i lalo o le Tulafono Tau Faaofi lena ina ia mafai ai ona faaoga se pule tataua a le Komesina po o i latou o lo o taitaia leoleo i lea taimi, o lea ua vaai i le faafitauli ma le faalavelave, ua tataua loa ona act i le taimi lena aua ua alu le process umi lea ae toatele le mamalu o le atuinuu ua afaina.

E pei o nai lagona na lau Afioga i le Fofoga Fetalai e avatu ai le faamalo. E lagolagoina e lenei itumalo o Falealili Sasae le Tulafono Tau Faaofi i ona vaega uma. Faafetai.

SUI FOFOGA FETALAI: Tulai mai le sui usufono mamalu mo Safata Sisifo.

Afioga LEAANA RONNIE POSINI (Safata): Lau Afioga i le Fofoga Fetalai, e fia faaali foi se manatu puupuu e tusa ai ma le Tulafono Tau Faaofi. Ae ou te faafetaia le Afioga i le Minisita e tusa ai ma le Tulafono Tau Faaofi, aua ou te talitonu o mea e tutupu o mea foi ia e fua i ai le Tulafono ma le Teuteuga o le Tulafono.

Na pau lava lea o se manatu puupuu i le Tulafono Tau Faaofi, se i silasila ifo lava lau Afioga i le Minisita ma le Matagaluega, o lea ua teuteu le Tulafono Tau Faaofi po o ogatasi ma le tulaga o Tulafono Faatonutonu ne i te i ua feteenai le tulaga o le Tulafono Tau Faaofi toe teuteu lenei ma le Tulafono Faatonutonu. Ma le agaga faaaloalo. Faafetai.

SUI FOFOGA FETALAI: Tulai mai le sui usufono mo Vaisigano Nu. 1.

Tofa LOPAOO NATANIELU MUA: Ae na ona ou tu atu lava e lagolago le matou itumalo i le Tulafono Tau Faaofi. Na pau lava le tulaga e fia faaalai ai se manatu, o le a le ituaiga auupega e faatagaina. O le uiga o le faamatalaga, a faapea nei e masii atu leoleo i se tulaga faapea ma ni a latou pulutasi a o la e tutu mai latou ma ni a latou pasuka, ia o le tulaga faigata lena. Ae a faapea foi la e susu atu leoleo i se tulaga faapea ma ni a latou fana taavili ae na o ni latou tamai fana lava, e tatau ona i ai foi sina puipuiga ne i te i foi ua fai le finagalo e lagolagoina e le tatou Maota nei o le tulaga lea ma mea e aumai ai e leoleo nisi auupega e le tatau ona aumaia i totonu o le tatou atunuu.

Ia ma le faamatalaga mulimuli, e faapefea ona oo mai fana ia e umia, fai mai na aumai vaa, a o ai lea e puipua le aumaia i totonu o nei mea? O lona uiga e alilali mai e le o lelei ona fai le galuega pe afai o lea e sao mai nei laau malosi ma auupega e le tatau ona faatagaina i le tatou atunuu. O lona uiga e le o lava le suesueina ua ala ai ona oo le finagalo o le Minisita o Leoleo e faia le tulaga lea. Ia, e faamanatu atu i lau Afioga i le Palemia ma le mamalu o le Kapeneta e toe silasila foi i lea tulaga ma le manaomia o tulaga faapea e ono toe faatupu ai ni faigata i totonu o le tatou atunuu. Ma le faaaloalo lava.

SUI FOFOGA FETALAI: Faafetai. Se i tulai mai le sui usufono mamalu mo Falealili Sisifo.

Tofa AUMUA ISAIA LAMEKO (Falealili Sisifo): Faafetai mo lenei avanoa, faafetai i lau Afioga i le Fofoga Fetalai. E fia fai foi se manatu o le itumalo o Falealili Sisifo e faatatau i lenei Tulafono Tau Faaofi. E avatu le lagolago i le teuteuga o lenei Tulafono Tau Faaofi lea ua see ese mai le Komesina o Leoleo ae tuu atu i le Minisita le malosiaga e mafai ai ona faaaupegaina le malu o le Malo.

O lenei Tulafono Tau Faaofi o lau iloa i ai, atonu o i foi e malupuipua ai le tatou atunuu, aua o lea ua tuu le pule faataga i le Minisita. O le processes po o

le faatinoina o le galuega ina ia mafai ona tuuina atu le malosiaga lea, e fautuaina ma le agaga faaaloalo tele le i ai o ni aiaiga. E pei o le faataitaiga o le faateaina o le tagata ma le nuu, e i ai ni aiaiga, pe fia aso o lenei malosiaga. Ia, o le tala lea ma le agaga faaaloalo tele. Faafetai mo le avanoa.

SUI FOFOGA FETALAI: E manatu o lea ua maea felafolafoaiga i le Tulafono Tau Faaofi lenei i lona taua. O le itu e faafetai ai o lo o lagolago uma finagalo faaalua o sui usufono mamalu le Tulafono Tau Faaofi, vagana ai ni nai ona teuteuga.

O le mea lea ou te tapa ai lau Afioga i le Minisita e tulai mai e talifuaitau i nisi foi o mataupu ma fautuaga.

Susuga Hon TUILAEP AUELUA FATIALOFA LUPESOLIAI LOLOFIETELE AIONO NEIOTI GALUMALEMANA Dr. SAILELE MALIELEGAOI: Lau Afioga o mataupu uma lava nei na laga, e le fou, e le i faapea foi e le i tutupu ni faalavelave faafuasei i le tatou atunuu. O le 50+ lenei o tausaga talu ona tatou tutoatasi, o mea uma lava la ia e alu atu, o mea uma ua tatou foi mai ai, ma sa i ai lava gaoioiga e fai i ai, e le mafai lava ona aveesea le faautautaga tatau e faaoga. E le o iinei foi i le Ofisa o Leoleo Tuivalea e vaai atu lava i le mea e tatau ona fai i ai se gaoioiga vave ae nofonofa lava. A o le mea lea, taatia mai lo outou faatuatuaga i le Matagaluega o Leoleo.

Ia o le toe tali atu lena lau Afioga.

SUI FOFOGA FETALAI: Faafetai i lau Afioga i le Minisita.

Na faamaonia le lafo ma faitauina le Tulafono Tau Faaofi o Teuteuga o le Tulafono o Malosiaga o Leoleo 2017 i lona faitauga faalua.

TULAFONO TAU FAAOFI O TEUTEUGA O LE TULAFONO O MALOSIAGA O LEOLEO 2017 – iloiloga auiliili

SUI FOFOGA FETALAI: Talu ai ua faamaonia le lafo mo le tulaga faanatinati i le Tulafono Tau Faaofi lenei, o lea o le a sagai atu loa le Fono Aoao mo le iloiloga auiliili.

E tusa ai ma Tulafono Tumau e amata le iloiloga auiliili i le fuaiupu 2.

FUAIUPU 2: Ua teuteuina le Fuaiupu 13.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Malosiaga o Leoleo 2017.

Faamaonia.

Na faagasolo le Tulafono Tau Faaofi o Teuteuga o le Tulafono o Malosiaga o Leoleo 2017 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O MALOSIAGA O LEOLEO 2017 – faitauga faatolu

SUI FOFOGA FETALAI: Ou te tapa lau Afioga i le Palemia o le Minisita mo Leoleo.

Susuga Hon TUILAEP AUELUA FATIALOFA LUPESOLIAI LOLOFIETELE AIONO NEIOTI GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Malosiaga o Leoleo 2017 i lona faitauga faatolu.*

Faalua e le Sui Palemia, Minisita mo Tagata Tafafao Maimoa Mai Fafo ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

TULAFONO TAU FAAOFI O TEUTEUGA O LE TULAFONO O LE FETUFAAAIGA O FAAMATALAGA TAU LAFOGA 2017 – faitauga faalua

SUI FOFOGA FETALAI: Peitai, o lea ua taunuu mai le mamalu o le Fono i lana malologa masani mo le 15 minute.

O le mea lea ou te faasilasila atu ai o le a faataatiaese Taulumaga a le Maota mo lana malologa masani e 15 minute.

Na faataatiaese Taulumaga a le Fono Aoaofaitulafono mo lana malologa masani i le itula e 10:46 i le taeao ma toe faaauau i le itula e 11:28 i le taeao.

SUI FOFOGA FETALAI: I le toe taliu mai o le Fono Aoaofaitulafono i ana galuega masani mo lenei aso, manatu o lea ua sao i alo le taligasua aua se faamalosiga mo galuega fai o lenei taeao. Malo le usuia o le fono i sui usufono mamalu uma o le Fonotaga.

TULAFONO TAU FAAOFI O TEUTEUGA O LE TULAFONO O LE FETUFAAAIGA O FAAMATALAGA TAU LAFOGA 2017 – faitauga faalua

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina le Tulafono Tau Faaofi*

o le Teuteuga o le Tulafono o le Fetufaaiga o Faamatalaga Tau Lafoga 2017 i lona faitauga faalua ma ou te fia tautala faamalamalama i ai.

Faaluaina e le Minisita mo Faatoaga ma Faigafaiva, Minisita o Tupe, ma le Minisita mo Aoga, Taaloga ma Aganuu.

SUI FOFOGA FETALAI: Ia tuuina atu le avanoa i le Afioga i le Minisita e te saunoa faamalamalama i le Tulafono Tau Faaofi.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai, atonu o le Tulafono lenei sa umi se taimi sa soalaupule ai ananafi i le tatou semina sa feagai ai ma sui usufono o le Palemene. O lenei Tulafono o le Tulafono o lo o i ai lava le Tulafono i le taimi lenei i le 2012. Pau le suiga o vaega e 5 o le Tulafono o lo o taumafai e sui, ina ia mafai ai ona maua le fesootaiga ma atunuu pe 17 o lo o i le taimi lenei ua tatou sainia ni feagaiga e mafai ona fetufaa faamatalaga tau lafoga.

O le agaga lava ia o le Tulafono e tele ina e le faapea o kamupani lea e resitala i totonu o le matou Matagaluega. O le tele o kamupani nei o lo o i le SIFA. O le auga foi o le Tulafono lenei o le tau faamalosi lea o le tulaga o le SIFA i le OCD, ona e tele o taimi o lo o masalomia o lo o i ai ni tupe eleelea o lo o i totonu o e o lo o faipaaga mai i le SIFA ma resitala a latou pisinisi i totonu o le SIFA.

O le agaga la o le Tulafono lea o le toe faamalosi ai o le toe vaai mai i fafo e tusa ai ma le galuega a le SIFA o lo o feagai ai. E talitonu lava o lo o outou silafia le tele o le aoga o lea foi Faalapotopotoga i totonu o tatou. O le faiga foi o le fetufaaiga o faamatalaga nei e le faapea e tuu sao. A aumai se talosaga a se atunuu e fia faamalamalama atu ni lafoga a se isi o lo o resitala iinei, ia e ave muamua e le matou Matagaluega i le Ofisa o le Loia Sili, ona ave lea i le SIFA, o latou o lo o faamaumaua faamatalaga o i latou nei. A uma le SIFA e i ai foi le Komiti o lo o e pei ona talanoaina ananafi o lo o latou soalaupuleina le faamatalaga e ave i fafo, ona faatoa mafai lea ona matou avea i se atunuu o lo o manaomia mai ni faamatalaga tau lafoga a se isi o lo o resitala i totonu iinei aemaise lava mo mea o financial institution. E le lavela lava pisinisi ia a le tatou atunuu o lea e sefe ma o lo o lelei.

E na o le 5 la vaega o le Tulafono o lo o taumafai e sui, e i ai nisi teuteuga o lo o tau ave i ai ia mafai ai ona faavave information a maua mai, ia talia loa e le Komiti ia ma le Loia Sili ma le SIFA se faamatalaga ua tataua ona ave i fafo, ona matou avea loa lea i fafo. Na o le atunuu foi la lea o lo o talosaga mai e ave sao i ai le faamatalaga lea. E le mafai foi ona access i ai se isi lava tagata i faamatalaga nei, i totonu o le matou Matagaluega aua e pei ona outou silafia o le SIFA o lo o resitala uma ai le tele o nei faipisinisi. Ae o le tasi lenei o Tulafono e fesoasoani tele i le SIFA, ina ia tumau ai pea le latou tulaga o lo o i ai, se tasi o Faalapotopotoga po o Offshore Banking e talitonuina i lenei vaitau i tupe a tagata o lo o mafai ona aumai latou tupe e teu faavaitaimi ai i totonu o le SIFA.

Ia e pei o le aso ananafi sa tele ona soalaupule ai e le tatou Palemene nei le Tulafono lea, ia ma o le auga lena o le Tulafono. E leai lava ma se aafiaga tele o le tatou vagana ai e o lo o teu a latou tupe i totonu o le Faalapotopotoga lea o le SIFA ia ma Banks ia, o le ANZ o le faamatalaga o le ANZ ia ae le o tagata la e bank ai totonu o le ANZ.

Ia o se faamatalaga atu lena i lau Afioga i le Fofoga Fetalai. E talitonu e leai nisi fesili aua ua alu ananafi o tulai le matou vaega e tali fesili a le tatou Palemene, ia faafetai.

SUI FOFOGA FETALAI: E manatu o le tulaga foi lea o lo o taoto ai i le Nofoa, manino ma malamalama le faamalamalama o lenei Tulafono Tau Faaofi i le aso ananafi, ia ona o tatou Tulafono Tumau, e tuu atu le avanoa lenei i sui usufono e fia saunoa i le Tulafono Tau Faaofi e pei ona lumamea nei o le Maota.

Tulai mai le sui usufono mo le Itumalo Tu Taulaga i Sisifo.

Afioga Hon FAUMUINA ASI PAULI WAYNE FONG: Lau Afioga i le Fofoga o le Fono, faafetai mo le avanoa. Ia e saolele lava le faamalamalama a le Afioga i le Minisita i le aso ananafi e tele manatu na faaalua. Ae i ai lava le agaga lea e tasi ua misi lau Afioga i le Fofoga o le Fetalai, o le a la le reliable o isi atunuu ia i totonu o le toa 17 lea? E mafai ona aumai ni faamaumauga pe a faapea ua tatou talosaga atu i se faamaumauga e aumai aua foi le silafia e le tatou atunuu. Aua o lea e foliga mai o le a maua le avanoa lea e mafai ai e le Malo ia ma lenei foi atunuu, ona avatu la faamatalaga nei e uiga i lafoga mo le silafia e atunuu i fafo. Ia o se manatu, e tatau foi la ona faigofie i se talosaga foi e avatu iinei mo kamupani o lo o agai mai i totonu o Samoa, ina ia mafai foi ona silafia ma iloa e le tatou atunuu ia faamaumauga ia.

Ia pau lea o se faamatalaga lau Afioga i le Minisita e ao ona maua ai se faamalamalama ma le faaaloalo lava, faafetai.

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai....

SUI FOFOGA FETALAI: Tulai mai le sui usufono mamalu.

Tofa Hon LAUOFO FONOTOE NUAFESILI PIERRE LAUOFO: Faafetai mo le avanoa, e puupuu foi se manatu o lenei sui usufono. E lua lava mea taua ia ou te maitauina i le Tulafono Tau Faaofi.

Muamua, ina ia malamalama ma iloa ai le feaveaiina ma le felafoaiina o tupe e le auvaega foi ia faatupu faalavelave na o terorisi. O lea la i lau vaai ma lau faitau, e sailiili maeaea ai, aua o lea e i ai mo **due diligence search** ma tulaga uma faapena i lalo o le Tulafono

Lua, e maua ai le auvaega foi ia e faalalafi solo a latou tupe. O lona uiga o le faalalafi o tupe, ina ia aua ai ne i totogi lafoga i atunuu e tatau ona totogi ai lafoga lona uiga mo mea o **Tax Avoiding Schemes**. Pei o vaega na taua o lea ou te vaai atu i ai.

Ae o le vaega lona tolu ou te fia fesiligia ai le Afioga i le Minisita, aua o i lea mo mea o accounts ia e aumai i le Tulafono e agai i ai mo le fetufaaiga o faamatalaga. Ae faapefea le tulaga foi lele o le feaveaiga o cash, aua e le o maua la i totonu o ni accounts, a? E i ai ia tulaga ia e pei e fai ma puna ae ma iloa ifo, le feaveaiina mo tupe tinoitupe. O tulaga la na e pei ou te vaai atu, e pei e faigata ona maua, pe lipotia i lalo mo mea o reporting standards ia e aumai i totonu o le tatou Tulafono. Ia o nai manatu na e tusa ai ma le mataupu lau Afioga faafetai.

SUI FOFOGA FETALAI: Ou te tapa lau Afioga, se i tulai mai le sui usufono mamalu mo Salega Sasae.

Tofa Olo Fiti Afoa Vaai: Faafetai i lau Afioga i le Fofoga Fetalai, leai e puupuu lava le fesili lava lea e fia maua ai se malamalamaaga. O le aso ananafi sa saunoa ai le Afioga i le Tamaitai Pule i le tulaga o le mea ia o personal research e le mafai ona access se isi i totonu o information ia. Ae i ai lava le lagona lau Afioga i le Fofoga Fetalai, aemaise lava i Afioga i Faipule o le Maota o Taitai o le atunuu e ao ona malamalama lelei i so o se informations i totonu o le Malo. E tataua lava ona allow ia Afioga i sui usufono e fai a latou research ia malamalama i le feuiaga o mea nei. Ia ona avatu ai foi lea o ni fautuaga i ni mea o faaletonu ia ma ni mea foi e toe faaleleia atili i le tulaga lea ua tulai mai ai le tatou Tulafono. Pei na o si vaega lea lau Afioga sa fia maua ai le malamalama.

SUI FOFOGA FETALAI: Faafetai mo le sui usufono mamalu. Ou te tapa lau Afioga i le Minisita e talifuaitau i mataupu sa laga na fesiligia foi e uiga i lenei Tulafono Tau Faaofi.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai, i le fesili a le sui usufono mo le Itumalo Tu Taulaga i Sisifo, o atunuu uma ia tatou faipaaga e 17 ua uma ona saina a tatou feagaiga mo le fetufaiga o faamatalaga. O lea la foi e i ai le talitonuga a tatou manaomia ni faamatalaga a se isi ua sau resitala iinei ae tatou te masalomia ia tupe ia e aumai, ona tatou fesiligia lea o atunuu ia ua tatou faipaaga. E 17 atunuu ae le faapea o atunuu uma o le lalolagi. O atunuu lava ua uma ona saina feagaiga ai ia International ia ma tatou faipaaga ma tatou saina a tatou feagaiga e tatou te fetuفاai ai information tau lafoga ia, e i ai foi le talitonuga e latou te tali mai foi o tatou manaoga pe a tatou fesiligia.

O le Afioga i le sui usufono mo Anoamaa Sisifo, e talitonu o le agaga tonu lena o information nei e fetuفاai, ona ia puipua ai tupe ia e money laundering o lo o gasolo mai i atunuu o le Pasefika. O le agaga la lena o le Tulafono lea e tatou te taumafai ai ia puipui mai le igoa tauleleia o le SIFA ia tumau pea le faatuatuaia e pisinisi o lo o resitala mai ia i latou.

Faafetai i le fesili i tupe ia e feaveai, cash lea feaveai, ou te masalo o le fesili lea e le o fesiligia mai i tupe ia ae lea e fesili mai i tupe ia e i totonu o le tatou atunuu lea e feaveai solo i fafo. O le taimi lenei, e pau lava le suesuega lea e mafai ona matou i o le malae vaalele, ona o le malaga i fafo o le tagata o lo o feagai ma le Ofisa o Femalagaiga ma tai i le Ofisa o Faatoaga i le vaega lea e latou te.... e le o oo i ai le matou Ofisa o Tiute i le vaega lea e o i fafo. Ae talitonu a alu se isi i fafo ma se taga tupe e nana i ona laei ma ona... e le maua. O lea e tau sue mai se taifau, tulou le Maota ma le fofoga o le atunuu, e mafai ona sniff ina ia tupe ia e nana e tagata. E tele auuala e mafai ona ave ai tupe i fafo o lea lava e saili i le taimi nei, ae pei o le agaga lena e matou te le o access i le vaega lea e o i fafo, e na o le vaega lea e omai i totonu o lea e access i ai le Tiute.

Ae i le personal reserves ia a le tagata talitonu e le mafai ona tagofia, e oo lava ia te au o le Minisita, e le mafai e i ai ia Tulafono o le Ofisa Tau Lafoga e puipua ai ia informations ia o latou tagata o lo o fai lafoga atu i pisinisi i totonu o le Ofisa o Lafoga. E le mafai foi ia te au ona ou access i ai i

informations ia, ona e i ai le Tulafono a le Ofisa o Lafoga e puipuia ai foi le confidentiality o le afaipisinisi i a latou faamaumauga o lo o i totonu o le Ofisa o Lafoga. E pau lava le mea e aumai ia te au o le amount atoa a o se upu e le mafai ona ou access i ai.

E pei o lau tali atu lena lau Afioga i le Fofoga Fetalai, faafetai mo le avanoa.

SUI FOFOGA FETALAI: E manatu o lea ua maea felafolafoaiga i le Tulafono Tau Faaofi lena, ma o le a tuuina atu ma le fesili.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2017 i lona faitauga faalua.

**TULAFONO TAU FAAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2017
– iloiloga auilili**

SUI FOFOGA FETALAI: E tusa ai ma Tulafono Tumau e amata le iloiloga auilili o le Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2017 i lona Fuaiupu 2.

FUAIUPU 2: Ua teuteuina le Fuaiupu 2.

Faamaonia.

FUAIUPU 3: Ua teuteuina le Fuaiupu 10.

Faamaonia.

FUAIUPU 4: Ua faaofiina le Vaega 3A fou.

Faamaonia.

FUAIUPU 5: Ua faaofiina le Faamatalaga fou.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

**IGOA: Teuteuga o le Tulafono o le Fetufaaiga o Faamatalaga tau
Lafoga 2017.**

Faamaonia.

Na faagasolo le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2017 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2017
– faitauga faatolu**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2017 i lona faitauga faatolu.*

Faaluaina e le Minisita mo Faatoaga ma Faigafaiva, Minisita o Tupe ma le Minisita mo Galuega, Felauaiga ma Atinae Eseese.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O
GALUEGA A LE MALO 2017 - faitauga faalua**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega a le Malo 2017 i lona faitauga faalua ma ou te fia tautala faamalamalama i ai.*

Faaluaina e le Minisita mo Faatoaga ma Faigafaiva, Minisita mo Tupe Maua ma le Minisita mo Tagata Tafafao Maimoa Mai Fafo.

SUI FOFOGA FETALAI: O le avanoa leni e tuuina atu i lau Afioga i le Palemia mo le saunoaga faamalamalama i le Tulafono Tau Faaofi.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le Tulafono lea e agai tonu lava i le tulaga o le tofia o i latou o ACEO po o Pule Lagolago i Matagaluega. O lea ua faatulaga atu i le Tulafono fou po o le Teuteuga leni, ina ia tofia e Le Ao Mamalu o le Malo i luga o le Fautuaga a le Kapeneta ia le Pule Lagolago. O le auau atoa lava o le Tulafono leni, ina ia aumai foi i le Kapeneta ia filifiliga o i latou leni e soalaupule e le Kapeneta ona o i latou ia e Pule Lagolago o i latou tonu ia, e agai atu i luga i le tulaga pule. O lona uiga, ina ia atoaatoa le tapenaga o faatalanoaga e fai ma ia sao atoatoa le

fautuaga. O le mafuaaga lea lau Afioga o le Teuteuga lenei. O le faapuupuuga atoa lena o le Teuteuga o le Tulafono.

SUI FOFOGA FETALAI: E manatu o lenei lava Tulafono Tau Faaofi na sasaa faaoti ai le utu o le faimea i le Palemene i le aso ananafi. E tusa ai o le Tulafono Tumau, o le avanoa lelei lenei mo sui usufono e fia saunoa.

Tulai mai le sui usufono mamalu mo Alataua Sisifo.

Afioga ALIIMALEMANU ALOFA TUUAU (Alataua Sisifo): Faafetai i lau Afioga i le Fofoga Fetalai mo le avanoa. E faatalofa atu foi i sui usufono mamalu o le Palemene, faapea Samoa ua potopoto mai.

E fia faaalua se manatu o Alataua Sisifo i le Tulafono Tau Faaofi o Teuteuga o le Tulafono a le Malo 2017 e pei ona opea i le Maota. O le saunoaga a le Afioga i le Palemia, o lo o faapea mai, ia avatu i le Kapeneta ina ia atoatoa ma sao atoatoa fautuaga e tuuina atu i Le Ao o le Malo mo le faamaoniaina o nei tulaga tofi. O le atugaluga o lenei itumalo, e foliga mai le Teuteuga ua leai se faatuatuaga a le Malo, i le Komisi e Pulea Tagata Faigaluega, latou te faia ai faaiuga. E matau atu e 50% o galuega a le Komisi lea e aofia ai Pule Lagolago po o Assistant CEO, o galuega ia e patino tonu i le Komisi lea e aafia mai i Principal se i oo lava i luga i Assistant CEO. Aua o CEO o lea ua avatu i luga i le Kapeneta. O le atugaluga la, o lona uiga o le a leai la ni galuega a le Komisi. Afai ua 50% le aofai o galuega ia ona o Pule Lagolago, o lona uiga e 50% le avanoa o le a leai ai ni latou galuega e faatino po o le mea o le a redundant ia ia tofiga.

O lona lua o manatu, e talitonu lava o lo o tele ma taua le tele o galuega, o lo o tau faasoasoa ai le taimi o le Kapeneta aua le tamaoaiga o le tatou atunuu. A toe faasee atu ma lenei galuega e mafai ona fai e le Komisi i le mea na ala ai ona tofia le Komisi. Ia na ona faapena atu. E talitonu lenei itumalo e tatau ona tatou vaavaai tonu i le mea tonu o lo o i ai le faafitauli. Afai o le faafitauli o le lē mafaia e le Komisi ona fai faaiuga, e atoatoa ma sao e ave ai le faamaoniga o ē e tatau ona tofia, o i ina e tatou vaavaai i ai. E le tatau ona suia le Tulafono ona o le lē agavaa po o le lē tonu ona faatino o galuega a le Komisi.

O le atugaluga lena o lenei itumalo, ma le faaaloalo lava lau Afioga i le Fofoga Fetalai. Faafetai mo le avanoa.

SUI FOFOGA FETALAI: Tulai mai le sui usufono mo le itumalo Tu Taulaga Sisifo.

Afioga FAUMUINA ASI PAULI WAYNE FONG: Faafetai i lau Afioga i le Fofoga Fetalai. Faafetai foi mo le Tulafono Tau Faaofi ua aumai i lenei aso. E leai lava se Tulafono e le nofo nofo aumai, ona ua i ai foi le mafuaaga. A faapea ua i ai se mafuaaga, e talitonu le agaga o le feeseeseaiga o Matagaluega ma le Matagaluega o le PSC, o lea foi la ua mafua ona oo atu i ai le Kapeneta latou te faia ia ia tulaga. Ae talitonu e sili atu le malamalama o le Pule Sili o le Matagaluega i tagata o lo o latou aumaia i luma, aua foi tulaga lenei o Pule Lagolago. O lea sa ave le faatuatuaga o le Kapeneta i le Pule Sili o le Matagaluega na te faia ai fautuaga fai foi ma faaiuga tonu e talafeagai mo le Matagaluega lava lea.

O lea la e avatu ai se fautuaga foi i le Afioga i le Minisita, e tuu ia le faatuatuga i le Pule Sili o Matagaluega, latou te filifili ai, fesoasoani i ai ma le Pule o le Matagaluega o Tagata Faigaluega a le Malo. Ua tele ina eseese ia fautuaga eseese foi ma faaiuga, o le mafuaaga lena ua ala ai ona tulai mai le Tulafono fou lenei.

Ae tatalo atu se i tuu ia lena avanoa se i fai ai e le Pule Sili o le Matagaluega se galuega foi e fetau mo ia. Aua a faapea ua aumai uma laua e pule atu e le Kapeneta le faaiuga o tulaga o i ai. O lona uiga e oo foi i le Principal ua latalata mai foi i luga i lea tulaga.

Na o se fautuaga, pe le ao ona toe talanoaina ma ave se fautuaga, ina ia fai lelei ae aua le aumaia. Ou te talitonu o lo o tele galuega a le Kapeneta lenei o lo o fai, ae o lea foi o le a toe faapipii atu i ai ma lenei tamai galuega.

O le manatu lea, ia manuia lava fuafuaga o le aso. Faafetai.

SUI FOFOGA FETALAI: Tuu atu le avanoa i le sui usufono mamalu mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa. O aso uma lava o le olaga, tatou te tusia ai le tatou tala faasolopito. O lenei la aso, o lea ua faaopoopo le isi laina i lou tala faasolopito. O se uluai taimi ua e nofoia ai le Nofoa o le Palemene o Samoa. Avatu le faamalo, faamanuia atu Lealaiauloto i lau Afioga i lenei aso.

Ae ao ona fai sou manatu i le Tulafono. O le isi lea galuega a Minisita lagolago e fai, ia latou galulue ma le Kapeneta e puipui le integrity i le tulaga aloaia o le Kapeneta i ana fuafuaga faataatitia. O lou talitonuga o le agaga na aumai ai le suiga o se agaga lelei. Aua a tatou matau, i lou sui usufono o le mea lava lea e lelei ai tatou aua tatou te nonofo ma ola i Samoa i tausaga e tele. Tatou te iloa le tele o mea e tutupu. I totonu lava ia o le Malo e tele faitioga, aemaise lava i tofiga nei, e tele faasea. E le iloa la e le Kapeneta aua ua le iloa e tagata po o fea a sulu i ai. Ona sulu loa lea i le Kapeneta i se fesoasoani i se fofo mo le faafitauli lenei. E lua lava mafuaaga e sui ai le Tulafono, e muamua tatou te tilotilo i le process po o le fatinoga o le Tulafono po o lelei ona faatino. Lua, tatou tilotilo ia i latou o lo o faafoea pe administer ina ia Tulafono, po o lelei ona faatino Tulafono e tusa ai ma le mafuaaga na aumai ai.

O au le isi sui usufono sa lauga i le mataupu lea i tausaga ua mavae atu. O le mea sa ou avatuina. Ua tele mafuaaga ma faafitauli i tagata ia ACEO level Pule Lagolago, i lou lava lagona faaletagata ua aveese e tatou le aia tatau a nai tagata nei e apili ai pe fesiligia ai mafuaaga ua aveese ai latou mai tofiga nei. Aua o le mea lea e i ai, e uma ona fai le faaiuga, afai e le toe tofia oe, ona e alu gugu lava ia i lou fale mai le tele o tausaga sa galulue ai. O nisi o sui nei, manatua e fai lipoti faaletausaga, e ese le lipoti e fai e le pule ese le lipoti e fai e le PSC. O lipoti uma nei e fai e latou e fua i luga o le galue a le Pule Lagolago. Ae uma ifo foi le interview ua sui. Ona fesiligia lea e nai tagata nei, ua fia tausaga o galue, aumai lau lipoti e A, ae o lea ua fai le filifiliga o au ae fai mai ua aveese au ou te le o galue. O mafuaaga la nei, i lou talitonuga o lo o i ai le malosiaga o le Komisi i lalo o le Tulafono Vaega 35 i lalo o le Tulafono, e ia i latou le malosiaga e appoint e faafaigaluega ai so o se tagata i totonu o galuega a le Malo se i vagana ia Faauluuluga o Matagaluega. O le mafuaaga lea i lou talitonuga, o nisi o taimi o lea ua ave e tatou le malosiaga i

le Komisi e pule malosi ai, ae leai se malosiaga i nai tagata nei e fesiligia ai le mafuaaga. Atonu o le tasi lea o le vaega. Aua o le lalolagi lea o lo o tatou ola ai, a ta malamalama lava ona ta nofo fiafia lava lea. O le mea lea ou te popole ai i le Kapeneta i lou lea nofonofo atu. E tasi lava le vaai mai o le atunuu ma tagata ua faapolokiki foi le vaega leni o le ACEO. Ae e le o le agaga lea i lou talitonuga. A tatou vaavaai i tausaga ua mavae atu, o nisi nei o Matagaluega a le Malo ua aveese mai lalo o le PSC i tausaga e le i umi atu. O le Ofisa o le Loia Sili, o le Ofisa o le Palemene lea e i ai tatou, o lea ua tutoatasi lava ma fai a latou filifiliga ma filifili e latou a latou ACEO ma tulaga faapena. O le fesili la, o i ai se faafitauli i Matagaluega nei? Aemaise le tele o Matagaluega Tumaoti a le Malo i le filifiliga o a latou CEO, aua e le o tele ni faafitauli o aliaie mai i Matagaluega ia e tutoatasi, o Matagaluega lava nei a le Malo lea fai e latou a latou lava filifiliga. E pei o lea e mafua mai i totonu i i. O le isi mea lea e i ai, e nofo le latou sui i le panel toe aumai le faaiuga toe decide e latou. E moni lava la e aumai le filifiliga le recommendation filifili e le toalua lea e le o o i le faiga o le interview, a o latou lava e tasi. Aua sa i ai muamua le CEO, pei o latou lea e faatinoa le faaiuga i lalo, ae faatino e latou le faia o faaiuga i luga.

A o le mea la lea o lea ou te popole ma atugalua ai, ia, i lau Afioga i le Minisita o le Matagaluega e Pulea Galuega a le Malo, o le atugalua lena, se i toe tagatagai ane i ai, aua o le Kapeneta ma le Malo, o le Malo uma lava a tatou, ma tatou te puipui foi i ai, mai mafauaaga o le atunuu ma tagata o le a faasino mai. Ae le o le agaga lea o le suiga o le Tulafono Tau Faaofi. Ae pe le tagai i nisi o vaega taua e ono sui ai le process. Afai o le process o lo o faaletonu, ia tagai. Afai o le tagata o lo o faatinoa le galuega, ia e tatau foi ona tagatagai i ai i le taatiaga o i ai. Ma le faaaloalo lava. Faafetai.

SUI FOFOGA FETALAI: Faafetai. Tulai mai le sui usufono mamalu mo Vaimauga Sisifo. Se i vagana nisi finagalo faaalua e ese mai i mea ia ua faailoa mai e sui usufono le sui usufono mamalu ia ona...

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, faafetai mo le avanoa. A o le i faia se manatu i le Tulafono Tau Faaofi, e faafesili atu ona o lea faatoa uma ona saunoa sui usufono ia, po ua e maua ifo faamaumauga a le Fofoga Fetalai sa i ai e le toe saunoa mai ni Minisita Lagolago i ni mataupu, aua o latou lava mataupu ia e aumai. Ae ui i lea, o le a fai atu sau faamatalaga.

SUI FOFOGA FETALAI: O le avanoa o le sui usufono lea ua tuuina atu.

Afioga SULAMANAIA FETAIAI TAUILILI TUIVASA: Ia, faafetai. Faafetai i le Afioga i le Minisita ua tuuina mai foi leni mataupu matagofie i totonu o le Laulau a Fono. E lagona lava le faafetai ma le faamalo.

Tofa Lealailepule Rimoni Aiafi: Lau Afioga i le Fofoga Fetalai...

SUI FOFOGA FETALAI: Se i tulai mai le sui usufono lea mo Faleata Sisifo. Alaala i lalo le sui usufono mo Vaimauga Sasae.

Tofa Lealailepule Rimoni Aiafi: E aoga lava tatou Fono nei tatou te fetufaai ai faapenei. O le mea nei, ua ta fiu e faalogologo ae na o le tutu ae le iloa e au malamalama i mea ia e saunoa mai ai sui usufono nei. E pei o le mea lea ou te fesoasoani atu ai i nisi o taimi. Ma le faaaloalo lava. Faafetai.

SUI FOFOGA FETALAI: Ia o lea ua faafofoga mai, o lea ua uma ona tuuina atu le talosaga a le Nofoa a faapea o nisi finagalo fou e ese mai finagalo faaalua... Saunoa....

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, se ua se ligoligo lava lou siufofoga i lenei taeao. Manaia le taitaiga o le Fonousu a le atunuu. O le tulaga lea e popole i ai le itumalo o Vaimauga Sasae, o le tamaliiaga po o le paiaaga o le Palemene po o le Kapeneta lea e faia le faaiuga, o lea ua le gata ina latou faia faaiuga i Ofisa Sili o Pulega, a o lea foi o le a faaeleelea atu i Ofisa Sili Lagolago. Ona i ai lea o lou lagona, o i lea e lape ai le tatou faamoemoe. Pau lava tala a le atunuu, ua faaituau foi tulaga ia.

SUI FOFOGA FETALAI: Malie lava le sui usufono se i tulai mai le Minisita.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi: Lau Afioga i le Fofoga Fetalai, e le i maua e le sui usufono, e le i faaeleelea le Kapeneta, o lea e faatutusa e le Kapeneta le taua o tofiga ia e lua, ae le o faaeleelea ai le Kapeneta aua e le o ni tofiga e eleelea. E pei o le mea lena. Ana e saofai i i o le Minisita, ona e silafia ai lea o le taua tele o le mea lea ua fai e le Kapeneta o le tuu i luga o le faataua o le Pule Lagolago.

Afioga SULAMANAIA FETAIAI TAUILILI TUIVASA: Se ua alofa atu ua mamafa le avega, o le ala lena o le taumafai atu, tuu mai pea Komesina Lagolago i le tulaga lea i le PSC o le latou matafaioi lea.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi: O le mea e fia faasao lau Afioga, e leai lava se avega e mamafa, e mama uma lava avega, ne i te i ua galo ia te oe, e mama uma lava avega. Silasila foi i le Kapeneta, o le matua talavou o le Kapeneta, ae o le amoamo ia, e mama uma lava mea e leai se mea e te popole ai.

Afioga SULAMANAIA FETAIAI TAUILILI TUIVASA: O le lagona lava o le sui usufono ia o le malupuipua o le Kapeneta ma ana faiga fai. O lea lava ua silasila le atunuu e tagaloa tusi lava latou i le tofiaina o le Ofisa Sili o Pulega. Ae pei o le manatu o le sui usufono mo Vaimauga Sasae, o le tulaga o le taitaiga o lea ua faamaoti ma faamalepe le Ofisa Sili a le Matagaluega lea o le PSC, o lea ua taatia i le Taitaifono ona o le tulaga i le feteenai foi o faaiuga a le Ofisa Sili o Pulega ma le Taitaifono. A o lea la e maitau atu e lou sui usufono ou te faafetai ai i le tagofia mai e le Kapeneta, ona o lea e lape lalo o le tulaga lea i le faatinoga o le auaunaga. A silasila i le faatinoga o le interview lea a le Assistant CEO, e fai e le panel, a o le panel

lea o lea e nofo ai i lalo le sui o le PSC. A maea la ona faatino le galuega lea a le panel, ona tuuina atu lea i le Komisi po o le Taitaifono, o i la lea e lape ai le mea, ona o lea ua toe sui e ia le faaiuga lea na avatu i lalo i le panel lea sa saofai ai le latou sui.

E pei la o le agaga o le sui usufono, a lelei le process, o le tele o suiga lea e fai e tatou, o le le agavaa ma le lelei o le faatinoga o auunaga e sui lea ua i ai ona tasui tatou Tulafono a o la e lelei lava le Tulafono la e i ai. Ona faapea lea o lou sui usufono, a faapea ua le agavaa le Taitaifono, dissolve lea Matagaluega, le Matagaluega lea a le PSC, aua foi o lea a uma loa le panel alu sao loa i luga, aua o lea e finagalo le toaina e avatu uma lava mea se i silasila i ai.

A o le agaga lea e fai atu ai lou sui usufono, aua ne i auai se sui o le PSC i totonu o le interview. Fai lava e le Ofisa Sili o Pulega ia ma nisi ia e avatu i tua, a maea loa, faatoa ave loa i le Taitaifono, teena pe le teena, e le atagia ai. A o le mea e tau augata ai le manatu, o lea e saofai ai le sui o le PSC i le interview, a o lea ua avatu toe teena mai e le Taitaifono. O i lea ua ala ai ona tagofia ma...

SUI FOFOGA FETALAI: Se i tulai mai le Afioga i le Minisita.

Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi: Lau Afioga i le Fofoga Fetalai, o au lea ua ou tau popole ona o lea e avatu le Tulafono Tau Faaofi, o lea o le a faataua le faiga o faaiuga, a o la e ua talatala mai e le sui usufono faaetonu la e na te silafia, ae o la e sa tetee mai i ai. Afai la o e silafia ni faaetonu o i ai, o le a le upu a le Aposetolo? 'A e iloa se mea faaetonu ae le faia i ai se gaoioiga, o le agasala molekale lena. E le gata ina e agasala, ae toe kale faalausosoo.'

Afioga SULAMANAIA FETAIAI TAUILILI TUIVASA: O le saunoaga a le Afioga i le Palemia, se ua ta alofa atu. A faapea ua filifili e latou le CEO, faaoga la Minisita Lagolago e filifilia le vaega lea i Ofisa Sili Lagolago, aua o lea e leai ma se mea o faia na o le tafafao lava le mea lea e i ai.

Lau Afioga i le Fofoga Fetalai, e pei o le manatu lea, ona o le manatu tele, ua ala ai ona silasila le Afioga i le Palemia ma aveese foi le suiga sa i ai, se i galue ma tulai mai le Afioga i le Taitaifono o le Matagaluega o Galuega, ae o lea e pei e foliga mai e faapea se lagona, ona i ai lea o lou manatu, ia, o tulaga na sa ta musu ai e toe noatia...

SUI FOFOGA FETALAI: Ia tulai mai le sui usufono mo Aiga i le Tai.

Susuga Mulipola Leiatua Laki (Aiga i le Tai): Lau Afioga i le Fofoga Fetalai, ou te tulai atu ma le agaga faaaloalo se i faasao saunoaga a le sui usufono. E le o se fale tafao le mea nei, o lea e tele lava le galuega lea e fai aua le tatou Kapeneta. Ma le agaga faaaloalo.

SUI FOFOGA FETALAI: O lea ua maua atu e le Nofoa. Faafetai mo le faasaoga.

Afioga Peseta Vaifou Tevagaena (Faasaleleaga Nu. 4): Lau Afioga i le Fofoga Fetalai, atonu ua maua lenei avanoa e fai atu ai se sao o lenei itumalo e faasaga i le finagalo o le sui usufono mamalu.

O le mea e fia faasao, e leai o Minisita Lagolago e le o ni Minisita tafafao, o le tele o galuega a Matagaluega o lea ua lafo mai i Minisita Lagolago latou te tauavea. E ala la ona ou tautala ona o le ma Matagaluega ma le Afioga i le Palemia. O le Matagaluega o Leoleo ma Tinei Mu, e le o se Matagaluega faigofie, e le soona tuua foi la i ai se Minisita Lagolago e tafaovale ai i totonu i o, na o le Minisita Lagolago ua tatau ma agavaa e tuu tonu lava i ituaiga Matagaluega ia. Ma lou faaaloalo lau Afioga.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai ona o lea ua saunoa le Minisita Lagolago...

SUI FOFOGA FETALAI: Ou te manatu e lelei ona aumai i le Nofoa e avatu le faatonuga e pei ona i ai le mataupu, le sui usufono mamalu mo Vaimauga Sasae....

Afioga SULAMANAIA FETAIAI TAUILILI TUIVASA: O lea ou te fai atu ona o lea ua saunoa le Minisita Lagolago lea a le Palemia, ae sa teena e ia o le Minisita Lagolago le mataupu a leoleo na tuuina mai ananafi e faatalanoaina. O fea la o i ai le fai mai e lagolago a o le mataupu a laua ma le Palemia a o lea e teena e ia le Tulafono a Leoleo lea e talanoaina? Ae o le a faauma atu le lauga a lenei itumalo.

Afioga Peseta Vaifou Tevagaena: Lau Afioga i le Fofoga Fetalai, e leai o se mea e fia faasao atu lava i le fasi fuaiupu lea. E le o se tetee i le Tulafono, o le fia faamalamalamaina o vaega o le Tulafono, ona o lea e faapea mai, ua na o leoleo ae le o taua mai le Komesina. O le mea la lenei na avatu ai le finagalo ananafi, o le mea e fia malamalama i le Tulafono. O lea la ua malamalama ae le o se tulaga faapea e saga tauai mai faamatalaga i lenei itu e tafafaovale.

SUI FOFOGA FETALAI: Faafetai o lea ua maua atu e le Nofoa, faamolemole le sui usufono mamalu mo Vaimauga Sasae, see ese ma le mataupu lea, tatou te le i oo i le Tulafono lea o lea ua maea ona pasia, ae lelei ona faamaea mai le saunoaga.

Afioga SULAMANAIA FETAIAI TAUILILI TUIVASA: Ia o le a ou see ese ma lea vaega, ae momoli atu le faafetai i lau Afioga. E pei o le agaga lea na avatu ai le sui usufono, ou te manumanu lava i le tulaga i le Kapeneta.

E pei o le agaga lenei ua lava le tofiga o CEO e pule ai latou, a o le vaega lea e i lalo ifo lagolago, pei o latou lea e mamafa i ai le avega i le tautuaina o le atunuu, e fai e le PSC ma le panel. Ae manuia tele lava lau Afioga i le Taitaifono ma le Maota.

SUI FOFOGA FETALAI: Ou te manatu o lea ua maea felafolafoaiga i le Tulafono Tau Faaofi. Ou te tapa lau Afioga i le Minisita.

Tofa Aumua Isaia Lameko: Lau Afioga i le Fofoga Fetalai, na o sina avanoa lava.

SUI FOFOGA FETALAI: Ia, tuu atu le avanoa i le sui usufono mamalu mo Safata.

Tofa AUMUA ISAIA LAMEKO: O le sui usufono mo Falealili Sisifo. O le faasaoga lea lau Afioga i le Fofoga Fetalai. Faafetai mo lou avanoa.

Atonu tasi lenei Teuteuga o le Tulafono Tau Faaofi ua leva ma tausaga, e momoli atu ai le faafetai tele i le Malo e tusa ai ma lenei teuteuga. O le tausaga 1977 sa faatulai mai ai le Pulega o Tagata Faigaluega, sa ave ai le pule faataga i le Komisi o Galuega a le Malo latou te tofia ma faamaloloina ai tagata faigaluega. Oo mai lea i le tausaga 2003, ona toe fai lea o le fetuunaiga a le Malo i lenei vaiata e faalaitiiti ai Matagaluega e 27 agai i Matagaluega lapopoa e 14. A o le tausaga e 2004, sa fai ai foi le isi Tulafono fou, o le Tulafono o Tagata Faigaluega 2004, ave ai le pule faataga i Faauluuluga o Matagaluega a le Malo latou te tofiaina ai i latou mai le level pito i lalo e gata i le principal level. Ona faaoga ai lea o le Vaega 35 o le Tulafono. A o le Vaega 36, e fa vaega taualoa e fai agai i ai le filifiliga, o merits, o le qualification, work experience, personal attributes ma le past performance.

E pei o vaega taualoa lea ua maea ona faataatia e le Komisi o Galuega le alafua, ou te manatu foi, ia, o tausaga ia ua tuanai, o lea ua ave le tulaga taualoa o i latou o Ofisa Sili o Pulega i le Kapeneta. O lou la manatu, ua alagata ona ave le tulaga taualoa lea mo a tatou Pule Lagolago, aua foi o lenei manatu, a malaga le Pule Lagolago i atunuu fafo, e le avea i le Komisi o Galuega a le Malo e faamaonia mai ai, e ave i le Kapeneta, e ave agai i le Kapeneta, o le Kapeneta foi e faia mai le filifiliga. A ave la i ai ma le tofiga, ia ua 110%.

E pei o sau faamatalaga lea e toe faaopopo atu ai e lagolagoina ai le Tulafono Toe Teuteu pei ona tuuina mai e le Malo mo lenei aso. Faafetai.

SUI FOFOGA FETALAI: Faafetai mo finagalo faaalua. Ma ou te tapa ai lau Afioga i le Minisita e tulai mai e talifua itau i mataupu sa laga.

Susuga Hon TUILAIPA AUELUA FATIALOFA LUPESOLIAI LOLOFIETELE AIONO NEIOTI GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faafetai ma ou faamalo i sui usufono mamalu sa sausaunoa, e le i soona faia foi le Teuteuga lenei. O upu tomua sa ou avatuina, o lea ua faatulaga tutusa le taua o mea nei o tofiga, e tofi e le Kapeneta le Faauluuluga ma le Pule Lagolago. O le taua o le itu lenei, ona o i latou na o le Pule Lagolago, o i latou na e see mai luga. Afai la e faaletonu le pule i lalo, e ono faaletonu foi le tofiga i luga i le taimi e fesui ai tofiga.

O le gagana lea e aumai nei o le a leai ni galuega a le PSC, o le gagana foi lea na aumai i le taimi na matou teuteuina ai le tulafono i le tasi ma faasee ese ai tofiga o i latou o Faatonusili i Matagaluega. O ituaiga gagana foi lava nei, o lona uiga o le a leai se aoga o le PSC. O la e tele o latou aoga. E leai se mea o le a popole ai i lenei tulaga. A o le itu puupuu lava lenei, ona o le faatauaina o i latou nei. E le o se tulaga faigata foi. E pau lava le mea taua, e aumai toe siaki e matou, o le tilotilo i le faatinoga o le process lea ma tilotilo i latou

qualification ma tilotilo i le fautuaga, aua o le tele ia o mea tutupu e fautua mai le tagata e aumai totonu, ae alu alu lava matou faalogo atu ua sui. O le atunuu foi lenei o se atunuu laitiiti lava, o le mea e tupu i sasae, e iloa uma lava i sisifo. O le tulaga la lena, leaga o tatou ua tagafa uma lava, ae a aumai i i, e i ai foi le faaeteetega i le Kapeneta, aua e ave uma pepa ia i o i Lana Afioga Mamalu O Le Ao o le Malo e fai mai ai le faaiuga mulimuli.

Lau Afioga i le Fofoga Fetalai, e le o se faiga ina ia leaga ai, a o le faiga ina ia lelei atili ai le Pulega. Ia o le toe faaopopo atu lena.

Na faamaonia le lafo ma faitauina le Tulafono Tau Faaofi o Teuteuga o Tulafono o Galuega a le Malo 2017 i lona faitauga faalua.

SUI FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Tulafono Tumau, Mataupu tau Faiga Palota, Talosaga ma tofiga faae-Faavae mo le iloiloa ma toe lipoti mai i le Fonotaga ia Iuni 2017.

TULAFONO TAU FAAOFI O TOTOGIFUAPAUINA MA TAU FAAEE ATU (TEUTEUGA ESEESE) 2016 – iloiloa auiliili

SUI FOFOGA FETALAI: E tusa ai ma Tulafono Tumau e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Tulafono Tau Faaofi mo le iloiloa auiliili.

Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga ALIIMALEMANU ALOFA TUUAU (Taitaifono Komiti o Tupe Maua ma Tupe Totogi): Faafetai mo le avanoa. Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Totogifuapauina ma Tau Faaee atu (Teuteuga Eseese) 2016 faatasi ma Teuteuga ma Faasaoga.*

Faaluaina e le sui usufono mo Palauli le Falefa.

Na faamaonia le lafo.

SUI FOFOGA FETALAI: O lea ua faamaonia e le Fono Aoa le lafo a le Komiti ma o le a sagai atu loa le Fono Aoa mo le iloiloa auiliili o le Tulafono Tau Faaofi.

E tusa ai ma Tulafono Tumau e amata le iloiloa auiliili i le Fuaiupu 2.

FUAIUPU 2: Ua teuteuina le Tulafono o Manuvaefa 1960.

FOFOGA FETALAI: O lo o i ai le Teuteuga i le Fuaiupu 2 e pei ona faaalia i le Pepa Faaopopo o Galuega.

Tulai mai le Taitaifono o le Komiti.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le Fuaiupu 2 e faapea:

“TEUTEUGA:

Ia aveese le palakalafa (e) ma suia i le palakalafa fou e faapea:

“(e) i totonu o le fuaiupu 40:

(i) *i le faafuaiupu (2), mo le palakalafa (j) ia suia e faapea:*

“(j) totogifuapauina ma tau faaee atu mo le faamoemoe o lenei Tulafono”;

(ii) *i le tuanai ai o le faafuaiupu (2), ia faaofi le faafuaiupu (2A) fou e faapea:*

“(2A) O le aofaiga o se totogifuapauina po o se tau faaee atu ua faatonuina i totonu o le faafuaiupu (2)(j):

(a) **e tatau ona fuafuaina e le Matagaluega; ma**

(b) **e noatia ma fai fuafua i le iloiloga ma le faamaoniga a le Komiti Faatino o Tupe Maua a le Atunuu i lalo o le Tulafono o le Pulega o Tupe a le Malo 2001”;**

Faamaonia le Teuteuga.

Faamaonia le Fuaiupu 2 e pei ona Teuteuina.

FOFOGA FETALAI: O le taimi lenei pe i ai ni finagalo faaalua e tusa ai ma Teuteuga o le Tulafono i lona iloiloga auiliili.

FUAIUPU 3: Ua teuteuina le Tulafono o Aperenitisi 2014.

FOFOGA FETALAI: O lo o i ai le Teuteuga i le Fuaiupu 3 e pei ona faaalua i le Pepa Faaopoopo o Galuega. Tulai mai lau Afioga i le Taitaifono o le Komiti.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le Fuaiupu 3 e faapea:

“TEUTEUGA:

Ia faaofi le fuaiupu 3 fou e faapea:

“3. Ua teuteuina le Tulafono o Auaunaga Faa-Soifua Maloloina a le Atunuu 2014 mo le Tulafono o Auaunaga Faa-Soifua Maloloina a le Atunuu 2014:

- (a) *I totonu o le fuaiupu 2, ia aveese le fuaitau ma le faamatalaga o “totogifuapauina”*
- (b) *I totonu o fuaiupu 12(1), 21(1), 27, mo “totogifuapauina faamaonia”, ia suia i upu “o le totogifuapauina ua faatonuina”;*
- (c) *I totonu o le fuaiupu 40(1), ia suia e faapea:*
“(1) o le aofaiga o se totogifuapauina po o se tau faaee atu e manaomia ina ia faatonuina:-

- (a) **E tatau ona fuafuaina e le Fono; ma**
- (b) **E noatia ma fai fuafua i le iloiloga ma le faamaoniga a le Komiti Faatino o Tupe Maua a le Atunuu i lalo o le Tulafono o le Pulega o Tupe a le Malo 2001.”**

Faamaonia le Teuteuga.

Faamaonia le Fuaiupu 3 e pei ona Teuteuina.

FUAIUPU 4: Ua teuteuina le Tulafono o Laisene o Pisinisi 1998.

FOFOGA FETALAI: O lo o i ai le Teuteuga a le Komiti i le Fuaiupu 4. Tulai mai lau Afioga i le Taitaifono o le Komiti.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le fuaiupu 4 e faapea:

“TEUTEUGA:

Ia toe faanumera le fuaiupu 3 e avea ma fuaiupu 4, ma ia aveese le parakarafa (c) ma suia e faapea:

“(c) i totonu o le fuaiupu 56-

(i) I le faafuiauupu (2):-

(aa) mo le faailoga piriota i le faaiuga o le parakarafa (b), ia suia le faailoga”, po o”;
ma

(bb) i le tuanai ai o le parakarafa (b), ia faaofi:-

“(c) faatonuina ai totogifuapauina ma tau faaee atu mo talosaga, tusi faamaonia, pepa aloaia po o so o se isi lava mataupu o manaomia po o aiaia i totonu o lenei Tulafono.”; ma

(ii) I le tuanai ai o le faafuiauupu (2), ia faaofi le (3) e faapea:

“(3) O le aofaiga o se totogifuapauina po o se tau faaee atu ua faatonuina i lalo o le faafuaiupu (2) (c):

- (a) e tatau ona fuafuaina e le Fono; ma**
- (b) e noatia ma fai fuafua i le iloiloga ma le faamaoniga a le Komiti Faatino o Tupe Maua a le Atunuu, i lalo o le Tulafono o le Pulega o Tupe a le Malo 2001.”**

Faamaonia le Teuteuga.

Faamaonia le Fuaiupu 4 e pei ona Teuteuina.

FUAIUPU 5: Ua teuteuina le Tulafono o le Tulaga o Tagatanuu 2004.

SUI FOFOGA FETALAI: O lo o i ai le Teuteuga a le Komiti i le Fuaiupu 5. Tulai mai le Taitaifono o le Komiti.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le Fuaiupu 5 e faapea:

“TEUTEUGA:

Ia faaofi le fuaiupu 5 fou e faapea:

5. Ua teuteuina le Tulafono o Auupega 1960- mo le Tulafono o Auupega 1960:-

(a) i totonu o le fuaiupu 2, ia faaofi i le faasologa sao o le pi faitau faa-Peretania le faamatalaga e faapea:

“Matagaluega” o lona uiga o le Galuega tau Leoleo a Samoa ua faavaeina i lalo o le Tulafono o Galuega tau Leoleo 2009;”;

(b) i totonu o fuaiupu 3(2), 6(1), 7(3), 9(2), ma le 12(2), mo totogifuapauina ua faatonuina i totonu o le faamatalaga 1, ia suia i “totogifuapauina ua faatonuina”

(c) i totonu o le fuaiupu 27:

(i) i le tuanai ai o le faafuaiupu (2) (d), ia faaofi e faapea:

“(da) le faatonuina o totogifuapauina ma tau faaee atu mo faamoemoega o leni Tulafono”; ma

(ii) i le tuanai ai o le faafuaiupu (2), ia faaofi:-

(2A) O le aofaiga o se totogifuapauina po o se tau faaee atu ua faatonuina i totonu o le faafuaiupu (2)(da):-

(a) E tatau ona fuafuaina e le Matagaluega ; ma

(b) E noatia ma fai fuafua i le iloiloga ma le faamaoniga a le Komiti Faatino o Tupe Maua a le Atunuu, i lalo o le Tulafono o le Pulega o Tupe a le Malo 2001.”

(d) ua soloia le faamatalaga 1.”

Faamaonia le Teuteuga.

Faamaonia le Fuaiupu 5 e pei ona Teuteuina

FUAIUPU 6: Ua teuteuina le Tulafono o le Ofisa o Tiute 2014.

SUI FOFOGA FETALAI: O lo o i ai le Teuteuga a le Komiti i le Fuaiupu 6. Tulai mai le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le Fuaiupu 6 e faapea:

“TEUTEUGA:

Ia faaofi le fuaiupu 6 fou e faapea:

6. Ua teuteuina le Tulafono o Faasalalauga 2010 – Mo le Tulafono o Faasalalauga 2010:-

(a) i le tuanai ai o le fuaiupu 9(1), ia faaofi e faapea:-

“1A O le aofaiga o se totogifuapauina po o se tau faaee atu ua faatonuina i totonu o le faafuaiupu (1):-

(a) e tatau ona fuafuaina e le Matagaluega i se feutagaiga ma le Pule Faatonu; ma

(b) e noatia ma fai fuafua i le iloiloga ma le faamaoniga a le Komiti o Tupe Maua a le Atunuu i lalo o le Tulafono o le Pulega o Tupe a le Malo 2001”;

(b) i le tuanai ai o le fuaiupu 73(2), ia faaofi e faapea:

“(3) E mafai ona faia Tulafono Faatonutonu i lalo o le faafuaiupu (1) e faatonuina ai totogifuapauina ma tau faaee atu mo le faamoemoe o lenei Tulafono, ma o le aofaiga o so o se totogifuapauina po o so o se tau faaee atu ua faatonuina i lalo o lenei fuaiupu:-

- (a) e tatau ona fuafuaina e le Matagaluega i se feutagaiga ma le Pule Faatonu; ma
- (b) e noatia ma fai fuafua i le iloiloga ma le faamaoniga a le Komiti Faatino o Tupe Maua a le Atunuu, i lalo o le Tulafono o le Pulega o Tupe a le Malo 2001.”

Faamaonia le Teuteuga.

Faamaonia le Fuaiupu 6 e pei ona Teuteuina

FUAIUPU 7: Ua teuteuina le Tulafono o Fomai Nifo 2007.

SUI FOFOGA FETALAI: O lo o i ai le Teuteuga a le Komiti i le Fuaiupu 7. Tulai mai le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le fuaiupu 7 e faapea:

“TEUTEUGA:

- (i) *Ia toe faanumera le fuaiupu 4 e avea ma fuaiupu 7.*
- (ii) *Mo le fuaiupu 7 fou ua toe faanumeraina, ia aveese parakarafa (a) e oo i le (c) ma suia e faapea:-*

“(a) i totonu o le fuaiupu 2, ia faaofi faamatalaga nei i le faasologa sao o le pi faitau faa-Peretania:

“Matagaluega” o lona uiga o le Matagaluega e nafa ma Tupe Maua”; ma

- (b) *i totonu o le fuaiupu 9(3), mo upu “se totogifuapauina ua fatonuina e le Komesina,” ia suia i upu, “o le totogifuapauina faatonuina”;*

- (c) *i totonu o le fuaiupu 14(2)(b), mo upu “o le totogifuapauina o talosaga tuai ma e \$200; po o se isi aofaiga e pei ona o le a faatonuina mulimuli ane”, ia suia i upu “le totogifuapauina faatonuina o talosaga tuai mai”.*

- (d) *i le tuanai ai o le fuaiupu 19(2), ia faaofi:*

“(2A) O le aofaiga o se totogifuapauina po o se tau faaee atu ua faatonuina i totonu o le faafuaiupu (2):-

- (a) **E tatau ona fuafuaina e le Matagaluega; ma**

(b) **E noatia ma fai fuafua i le iloiloga ma le faamaoniga a le Komiti Faatino o Tupe Maua a le Atunuu i lalo o le Tulafono o le Pulega o Tupe a le Malo 2001”;**

(e) *Ua soloia le Faamatalaga 2.*

Afioga Hon FIAME NAOMI MATAAFA (Sui Palemia): Lau Afioga i le Sui Fofoga Fetalai...

SUI FOFOGA FETALAI: Ia saunoa lau Afioga i le Sui Palemia.

Afioga Hon FIAME NAOMI MATAAFA: E faatalofa atu ma le agaga faaaloalo i leni taeao, se i fai se malologa a le Afioga i le Taitaifono o le Komiti. E maitau atu i le tatou galuega lea e fai, o se galuega faaalu taimi, ae ou te vaai atu e tagatasi ia suiga ma faaupuga. E pei o se mataupu e faatu atu i lau Afioga i le Fofoga Fetalai, e leai ea se isi auala faafaigofie e mafai ai ona toe aumai le tino o le Tulafono i se tulaga foi lea ua maopoopo mai, aua ua toeitiiti lava fuaiupu uma o le Tulafono lea ua fai i ai le mea lea.

Leai na ona taatia atu pe o le a se fautuaga a le tatou Failautusi o le Fono, ia ma e foi o lo o i ai le poto masani i a tatou Tulafono Tumau. E fai lava sina maoae o leni Teuteuga.

LAFO MO LE FAASEE I TUA O LE TULAFONO TAU FAAOFI (T.T.114)

Susuga Hon TUILAEP AUELUA FATIALOFA LUPESOLIAI LOLOFIETEELE AIONO NEIOTI GALUMALEMANA Dr. SAILELE MALIELEGAOI: Lau Afioga i le Fofoga Fetalai, e seasea tupu se mea faapenei, o le toe teuteu uma o le Tulafono. Ma o lea la ou te faatu atu ai le lafo, e toe faaseese atu i tua le Tulafono lea e toe tusia atoa ina ia aumai ua i ai uma mea ia, sa tatau ona logo atu au i le tulaga lea ua i ai le Tulafono lea.

Ma o lea la ou te faatu atu ai le lafo, Ina ia toe faasee i tua le Tulafono lea e toe teuteu atoa, tuu i ai mea ia, ona aumai loa lea tatou talanoaina i le tulaga ua maea ona tagofia e le Komiti.

Faaluaina e le Sui Palemia, ma le Minisita mo Faatoaga ma Faigafaiva.

Na faamaonia le lafo ma tulai ai le Tulafono Tau Faaofi o Totogifuapauina ma Tau Faaee Atu (Teuteuga Eeseese) 2016 ua faauieseina.

SUI FOFOGA FETALAI: Ia saunoa lau Afioga i le Palemia.

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETEELE AIONO NEIOTI GALUMALEMANA Dr. SAILELE MALIELEGAOI: Lau Afioga i le Fofoga Fetalai, talu ai ona o lea ua maea

galuega na atofa mo le Fonotaga lenei a le Palemene, a o lea foi e galulue Komiti. Ou te momoli atu le faamalo i Komiti i le tele o galuega sa feagai ma outou, ma o le tulaga lava lea ua ala ai ona sui atoa le faiga o a tatou Fonotaga ona o le tele o mataupu uma ua tagofia e le Komiti e faaaoga i ai ma faafaigaluega uma i ai sui usufono o le Palemene. O Palemene i aso la, e na ona tuua lava o le Fono ia ona taape loa lea, a o le taimi lenei ua taufai galulue uma lava ia sui usufono, e le gata o Minisita Lagolago e lagolago i Minisita o le Kapeneta, ae faapea foi i a outou Afioga o lo o galulue i totonu o Komiti. Ma o le ala siitia ai foi lea o le maualuga o le galuega ua ausia aemaise tatou Tulafono, se i vagana ai si vaega lea, ou te taofi ana vave oo atu ia te au semanu e fai ai le faiga lelei lea e mautu ina ia toe tapena atoa le Tulafono ma faigofie ona aumai i totonu o le Maota nei. A o le faafetai, o lenei ua taoto lau Afioga i le Fofoga Fetalai.

E faamalo atu foi i lau Afioga i le faafoega o le tatou Fonotaga i lenei taeao. O lea ou te maitau ua uma ona faataoto a tatou aso Fono, ua le o toe tuu foi lea faapagaenoa a tatou Fonotaga, ua faatulaga lava aso Fono tatou te Fono ai i le tausaga atoa ia ma fua faatatau foi i ai ia galuega a Afioga i sui usufono.

O le mea lea ou te tulai atu ai e faatu le lafo, *Ina ia malolo loa le tatou Fono, toe ae mai i le aso ua uma foi ona atofa tatou te toe Fono ai ma faaaauu loa ia le mataupu lea sa toe tolopo i le taeao nei.*

O le lafo lea ma le agaga faaaloalo.

Faaluaina e le Sui Palemia, Minisita mo Pisinisi, Alamanuia ma Leipa ma le Minisita mo Faatoaga ma Faigafaiva.

Na faamaonia le lafo.

SUI FOFOGA FETALAI: Ou te manatu o lea ua tatou i ai nei i le siui o galuega o lenei taeao. Ae ia te au le ava ma le faaaloalo ou te momoli atu ai le faamalo ma le faafetai tele i sui usufono uma o le Palemene. E momoli le faafetai i lau Afioga i le Taitai o le Maota, faamalo le faatoatoa, faamalo le onosai aua le faatautaiga o le Maota i lenei taeao.

Ou te momoli foi le faamalo i lau Afioga i le Sui Palemia, le mamalu i Alii ma Tamaitai o le aiga Kapeneta. Faamalo faafetai i le faamaninoga o tulaga uma o tatou Tulafono Tau Faaofi, malo le tapena, faamalo le onosai i tiute fai o lenei aso. E faapea foi sa matou faamalo i le paia o Minisita Lagolago i lo outou tiute fai ma la outou matafaioi. Faamalo le galulue, faamalo le onosai. Le paia o sui usufono filifilia i lenei taeao, malo le tofa, malo le uta, lea ua manino le mata o le vai i tulaga uma sa fia faailoa. Na ona matou momoli atu o le faamalo ma le faafetai tele i lo outou finagalo faaalua e tusa o le Fonousu lea ua tau i siui.

E le mafai foi ona matou nofonofu, e ao ona matou momoli atu le faamalo i Faauluuluga o Matagaluega a le Malo ma kamupani tumaoti, o lea ua outou faafofoga i le taua o lo outou tiute tauave. O la matou tatalo i le Atua, ia i ai le alofa ma le agalelei i o outou tiute fai, maua so outou finagalo e tua i ai le Malo aua le faatinoga o le auaunaga. E faapea foi ona ou toe momoli le faafetai tele i le tapuaiga a Samoa i ona tafa e fia, malo le tapuai mai, ua ae manuia faiva o lau Palemene ona o la outou tapuaiga.

Le paia o lou itumalo Gagaemauga Nu. 3, faafetai i la outou tapuaiga ua manuia faiva o alo ma fanau ma lo matou nofonofu atu ai i le Maota o le

Palemene ona o la outou tapuaiga leleoa. O le mea lea ia faamanuia le Atua, ia taape le filialii ma tuuama le fua, malaga ia le paia o le Palemene ma manuia o le Atua. Faafetai mo le Fonousu i lenei taeao, o lea ua ae manuia o tatou faiva.

O le mea lea ou te tatalo atu ai ma le agaga faaaloalo i le sui usufono mo Falelatai ma Samatau e te faaiuina le tatou Fonotaga i lenei taeao i se tatalo.

Na tolopo Taulumaga a le Fono Aoao i le itula e 12:40 i le aoauli seia aulia le itula e 9:00 i le taeao, Aso Lua, 30 Me 2017 e tusa ai ma le Polokalame o Fonotaga a le Palemene 2017/2018.